



UNIVERSITÄTS-
BIBLIOTHEK
PADERBORN

Universitätsbibliothek Paderborn

Petri Angelii Bargaei Commentarius de Obelisco

Angèli, Pietro

Romae, 1586

Petri Angelii Bargaei Commentariis de Obelisco.

urn:nbn:de:hbz:466:1-13181

PETRI ANGELII
BARGAEI
COMMENTARIVS
de Obelisco.



T si in revalde antiqua & perobscura, cuius vestigia magno cum labore vel indagare, vel odorari oporteat, paucissima sunt, quorū opere nos, quod volumus assequamur, ex ijs tamen & paucis, & parum explicatis ea eligere conabimur, quæ generatim quidem ad omnium Obeliscorum, singillatim verò ad eius, quem Caius in Vrbem importauit, cognitionem facere videbuntur: id enim in primis quærendum est. Atq. hoc ipsum, quò commodius persequi, & conjecturas nostras, quoad fieri hac huiusmodi in re à nobis poterit, certissimis argumentis confirmare valeamus, ab illis, qui hæc legent (si modò vlli legēt) impetratum cupimus, ut paulò altius, quam fortasse ipsi velint, exordiri nobis liceat. Sic enim fiet, vt & nos quasi semel manu arreptum, atque apprehensum funem secuti, ex huiusmodi labyrinthi

B planè

planè cæcis ambagibus egredi, atque ex variarum opinionum fluctibus, Symplegadum more inter se concurrentibus euadere minus desperemus: & illi cum ad institutæ à nobis commentationis finem peruenient, iudicare facile queant, recte ne, an secus cursum in tantis tenebris, atque in tam angustis vadis tenuerimus. Sed, ne cuiusquam animum diutius quām par est à lectione remoremur, & aliena facilitate atque otio licenter abutamur, iam nunc à nominis notatione id, quod in quaque re Stoici facere consueuerunt, totius disputationis nostræ initium capiemus.

Obeliscum igitur vocem esse Græcam, & à voce græca ὄβελος deriuari, nemo est qui dubitet. ea latine veru nominatur: instrumentum scilicet ferreum, quod in prima sui parte crassiore corpore cum sit, paulatim minuitur, donec in acutam cuspidem definat. Eo carnes ad ignem circumvolutæ torrii consueuerunt. Virg. lib. ii. Georgorum.

Pinguiaque in veribus torrebimus exta columnis
A cuius similitudine Sabini telū, quo in bellis utabantur, veru appellauerunt: itaque idem Virg. lib. vij. Aeneidos.

Et tereti pugnant mucrone, veruque Sabello.

Quo tamen in loco Seruius Grammaticus juxta nonnullorum opinionem pro veru, pilum accipi debere scribit. Quod tamen non longe à veru, si pili formam inspexeris, distare videatur. Est igitur Obeliscus asperrimus lapis in figuram metæ cuiusdam sensim ad proce-

proceritatem consurgens excelsam: utque radium imitetur, gracilescens paulisper, specie quadrata, in verticem produktus angustum, manu leuigatus artificis, formarum autem innumerarum notas Hieroglyphicas appellatas habens, quas ei vndiq; videmus incisas, atque ad iam tum exorientis sapientiae initia commostranda ex veterum auctoritate adinuentas. Hae fermè sunt verba, quibus Ammianus Marcellinus Obeliscum non definit ille quidem, sed describit. Cæterum quoniam diximus vnde dictus sit, & verbi notatio à nobis allata cum huiusmodi descriptione consentit, videamus etiam cur potius Obeliscus, quam Obelus, ὑποκριτῶς scilicet, nominetur, Græcorū more: qui stellulas, regulos, rotulas, quas illos paruulos Deos Panes ἀσερίσκους, βασιλίσκους, τροχίσκους, καλαθίσκους, πανίσκους vocat. Cum enim immane quoddā saxum sit, cuius altitudo, ut suo loco ostendemus, alicubi cxx.cubitorum sit; par esse videbatur, ut in eo appellando voce potius rem ipsam augente, quam diminuente vteremur. Neque enim aliud est Obeliscus, quam latine si dixeris veruculum, hoc est paruulum veru. Non ignoro esse qui huiusc vocis minutæ rationem eò acutè ac subtiliter reuocent, ut affirment non magis Obelisci formam apud Aegyptios, quam nomen ipsum esse inter Hieroglyphicas notas percensendum: ut, quemadmodum Obeliscus, idest, moles illa faxea ad veru similitudinem conformata mentem significat nostram ad vnum modò Deum se efferentem, instar radij solaris, qui quo longius à Sole

B 2 disce-

discedit, eo latior sit: quo minus, eo acutior, & in vnum ipsum lucis auctorem, quasi in punctum definit: sic ingens illud saxum, si cum acie mentis nostræ se se in Deum erigentis comparetur, rem minutissimam ac perexiguam videri oporteat. Docta sanè ac peracuta notatio, si pro certo nobis constaret, Aegyptios ipsos, apud quos Obeliscus primùm inuentus est, sua ipsorum lingua huiusmodi molem diminuenti voce appellauis se. Quamquam Plinius Aegyptio nomine significari Solis radios testatur, illic scilicet, ubi ad hanc rationem loquitur: *Trabes ex eo facere Reges quodam certamine, Obeliscos vocantes, Solis numini sacratos, radiorum eius argumentum in effigie est, & ita significatur nomine Aegyptio.* hæc Plinius. Sed si tamen illi tam grande saxum ὄπορισμῶς nominabant; cur Herodotus, qui in Aegypto fuit, & omnia à Sacerdotibus diligenter vel curiose potius perscrutatus est, non ille quidem Obeliscos, sed Obelos vocat? ut mihi omnino verisimile videatur, Aegyptiorum lingua suisse ea voce dictos, quæ Obelo, nō Obelisco responderet. Quamquam non ignoro Diodorū Siculum, & alios Græcos & Latinos ab Herodoto hac quidem in re discedentes, dixisse Obeliscum: cuiusc e nomencraturæ rationem, quantum coniectura consequi poterimus, hinc iam aperire incipiems. Quando igitur Herodotus, ante quæ nemo apud Græcos, quod sciam, eius saxeæ trabis mentionem fecit, Obelum semper, Obeliscum nominat nunquā; credibile est, ut mihi quidem videtur, ab ijs, qui Herodotum

tum consecuti sunt, eam esse vocem usurpatam, qua, qui Aegyptum inuisissent, plurimum vterentur. Eos autem ab infinito propemodum earum trabium numero, quae in Aegypto erant minores, huiusmodi omnes lapides Obeliscos appellauisse: quales Romam ex Aegypto plurimas aduectas fuisse scimus, ut obeliscorum multitudine proprium & peculiare Obelorum nomen obscurauerit. Fieri etiam poterit, ut Obelisci à contrario sensu nominati sint: nimirum, ut quemadmodū lucum à lucendo dicimus, quem arborum densitate & frequentia umbrosum atque obscurum esse constat; ita illi Obeliscum appellauerint, cū *ναρὰ ἀντίφαση* immamen esse molem significare voluerint: ad cuius altitudinem ante hominum oculos exponendam, & quasi representandam nulla vox satis idonea reperiatur: satius ut fuerit ad oppositum verbum configere, quam illud usurpare, in quo præter unam huiusmodi vocis translationē, nihil omnino spectaremus, quod re postmodū cognita & perspecta, animum nostrum ad admirationem magnopere traduceret: ex quo etiam, nisi planè fallor, factum est, ut vulgo tam immanem molem deriuato nomine ab acu *ἀποκορισμῶς* Aguglia, quasi tu dixeris aciculam, appellemus. Non enim minus ad acus, quam ad veru formam & similitudinem accedit. Tertia restat ratio, quamobrem huiusmodi nomen tantę moli fuisse impositū existimare non ineptè fortasse debeamus, ea est, quod cum tantorū lapidum vertici orbem inauratum imponi, atque in superma

ma ipsius orbis parte veruculum infigi consueuisse con-
stet, id quod ex eo globo, qui in Caiani Obelisci verti-
ce spectabatur, discere omnes potuimus; factum esse,
ut tota illa moles diminuenti nomine fuerit appellata.
Quarum notationum ea quisque sequatur, quam ma-
xime probauerit, si quam modo probauerit, aut certe
ipse meliorem excogitet. Quòd si etiā ἀλλιγορίως ac-
cipi voluerit; nihil est, quamobrem reprehensionem
pertimescat meam. Vnicuique enim debet esse iudiciū
suum maxime liberum. Mihi satis superque est in me-
dium adduxisse, quæ in primis probabilia esse videbā-
tur, omissis allegoriis, quarum vi, nihil fermè est, quod
ad diuinitatem aliquo modo referre nequeamus: pre-
sertim si licuerit eās qua vis in re, aut in voce, aut in nu-
meris scrupulosè & subtiliter Pythagoreorum more
persequi. Obeliscum igitur, seu tu Obelum cū Hero-
doto nominare malueris, ex asperrimo lapide fieri cō-
sueuisse & Ammianus tradidit, & cæteri scriptores
memoriæ mandauerunt: inter quos Diodorus Siculus
συληρὸν λίθον saxū, ex quo siebant vocat: id est rude, aspe-
rum ac durum. quem quidem lapidē Plinius Pyrhop-
æcilon vocatum fuisse scribit antequam Syenites vo-
caretur. etenim Pyrhopæcilos diētus est, quod punctis
quibusdam ignei coloris distinctus, ac varius vndique
interluceat. eum postea Syenitem nominarūt, quod ex
ijs montibus, qui Aethiopiam attingunt, atque à Sye-
ne Thebaidos non longè absunt, exscindebatur. Id
autem dupli de caussa ab Regibus Aegyptiis factum
fuisse

fuisse arbitror: nimirum, ut & huiusmodi monumen-
ta diutissimè conseruarentur, & Soli, cui dicabantur,
tum ex figura, tum ex colore in primis conuenirent.
Saxum enim illud durissimum cum sit, neque intercur-
rentibus venis & scissuris dissilit, neque exeditur salvi-
gine, neque vetustate collabitur, neque ullarum tem-
pestatum iniuriam pertimescit. ut, nisi hominū ope-
ra, atque ignium vis accesserit, sempiternū atque im-
mortale permansurum esse videatur: quod aliis nō ac-
cidit. Figura verò, in quam conformatur, quod Solis
radios imitetur, ad Solem quoque referatur necesse est.
Sensim enim instar metæ ad proceritatem consurgit,
& illam quidem excelsam. Est omnino Obeliscus ita
factus, ut, quamquam idem cum metæ non est, tamen
haud sanè longè discedat à specie & figura ipsius metæ.
cuius quoniam Ammianus in Obelisci descriptione
meminit, eumque illi persimilem esse dicit, non om-
nino absurdè fecisse videbimur, si antequam longius
progrediamur, quid sit metæ statuerimus. Quamquā
enim res ipsa per se latis nota est; tamen, quia ad initia-
turam à nobis lcriptionem magnopere pertinet, ut exa-
ctè cognoscatur; non pigebit hic adscribere quæ scitu
non omnino indigna videbuntur.

Metam igitur Latini dixerunt à metiédo, siue à me-
tando, quod idem est. statui enim consueverat in ex-
tremis Circi partibus, ad quam currus in ludis curulib-
us cum peruenissent, necesse habebant septies circū
metam agi. Propertius libro ij. Elegia xxv.

Aus



*Aut prius infecto deposito præmia cursu
Septima quam metam triuerit ante rota.*

Et Horatius:

*Sunt quos curriculo puluerem Olympicum
Collegisse iuuat, metaq; feruidis
Euitata rotis, palmaq; nobilis
Terrarum dominos euehit ad Deos.*

Ea Pyramis quasi quædam erat. à perampla enim & lata basi incipiens in acutū apicem desinebat. Sed Pyramis tribus, aut etiam quatuor lateribus constabat, vt loco suo dicemus: meta in orbem surgebat, tendebatque tanquam turbo inuersus in acumen. Itaque ea Græci *κώνος* vocabant, de quo Aristotiles in Problematiſ *τοι γὰρ κώνος, οὗ ἡ βάσις, κύκλος.* *Conus*, inquit, est cuius basis circulus est. qua voce Cicero quasi Latina utitur lib. 2. de Nat. Deorum: *Conum*, inquit, tibi aīs & cylindrum & pyramidem pulchriorē, quam sphēram videri. & lib. pri. At mihi vel cylindri vel quadrati vel coni, vel pyramidis videtur esse formosior. Meta igitur dicebatur quarumcūque rerum congeries, quæ latam & globosam basim cū haberet, in acutum verticem desinebat. Quare Cicero lib. 2. de Diuin. vmbra terræ, metam noctis vocat. Vident, inquit, hęc constantissimo motu Lunę, quando illa ē regione Solis facta incurrat in vmbra terræ, quę est meta noctis, vt eā obscurari necesse sit. Vnde etiā & Coni dicūtur à Grēcis turbines illi teretes, quos pueri funiculo circuacto in orbē præcipites conuerti cogūt, dum in compitis inter se ludunt. quin & metas appellamus seu fœni, seu

seu paleæ, seu frumenti strues : quas à rusticis in agris,
& apud villas passim confici videmus, quò commo-
dissimè defendantur à pluuiis. Quamquam autem
diximus figura orbiculata & globoſa metas construi,
non ignoramus tamen Pyramides, quæ metæ sunt, nō
nullas inueniri, quarum aliæ sunt quadrangulares, aliæ
triangulares: Sed ad Obeliscum redeamus, quem quia
metæ similem Ammianus esse dicit, nos in meta decla-
rāda longiores fortasse fuimus, quām oportuit. Eum,
ut paulò ante dicebamus, Plinius trabem appellat, &
à Mitre fuisse institutum asserit, qui in Solis vrbe regnū
obtinebat, idque illum fecisse somnio admonitum :
quemadmodum in ipso Obelisco inscriptum fuerat.
ut mirari, ne dicam ridere illos liceat, qui affirmant &
Obeliscos & Pyramides à doctissimis illis sacerdotibus
excogitas, vt essent nobis tanquam quædam mentiū
nostrarum imagines, quæ ab humanis cogitationibus
ad diuinis nos traducerent, & cum Deo rerum omniū
auctore coniungerent. Praeclarum sanè inuentum, &
doctorum piorumque Sacerdotum sapientia vel in pri-
mis dignum, si ad hoc ipsum faciendū ab ijs potius, q
à superstitione Rege ad expiandū somniū fuisset insti-
tutum. Neque tamen is sum, qui nesciam Heliopolim
potissimum fuisse sedem Sacerdotū, qui philosophiæ
& Astronomiæ cæterisque omnibus liberalibus facul-
tatibus operam darent, & Pythagoram, Democritum,
Zamolxin, & Solonem eò profectos esse; Platonem
verò & Eudoxum tredecim ipsos annos apud illos per-

C man-

mansisse; ut philosophiæ Thœologiæque arcana perdiⁿ
secerent. Versabantur illi quidem in rerum natura in-
daganda, sed ita tamen, ut quām ipsi cognitionem af-
fecuti essent, eam aut obscure traderent, aut omnino
alios occultarent. Fieri igitur potuit, ut quod Mitres
somniauerat, ipsi acutè excogitata radiorum solarium
imagine quasi quadam, re ipsa conformauerint, &
inde philosophandi occasionem præbuerint multis.
Facile enim est interpretari quod fortuitò sit inuentū;
Id prudenter fuisse excogitatum. Vtrum autem Mitres
(leu Mithras dici malueris, idem enim nomen est) qui
primus Obeliscum adiuuenit, idem sit cum Mena, qui
primus Aegyptiorum Rex fuit; e quidem nō ausim af-
firmare, quando & Menas lunam, & Mitres Solem
significat, vtrunque apud Aegyptios in magna venera-
tione & cultu habitum: quorum alterum Osyrim, al-
terum Isim vocabant. Herodotus certè ac Diodorus
nusquam Mitræ Regis, quod sciam, mentione faciūt:
Menam autem vterque scribit primum in Aegypto re-
gnauisse. Eusebius ex libris Manethonis sacerdotis
Amasis Aegypti Regem primū nominat: Mephrem
quartum: ut in tanta rerum ac nominum obscuritate
& confusione nihil certi statui possit. Id verò inde fa-
ctū arbitror, quod innumerabiles penè Reges in Aegy-
pto cum regnauerint, per paucorum nomina memo-
rię mandata sunt à scriptoribus; ac non eadem ab om-
nibus omnia, sed ab alijs alia, prout quisque ex Sac-
dotibus, quoru erat cura, ut acta conscriberent, hunc,
aut

aut illū Regem vel amabant, vel oderant. Quare apud Diodorum legimus inter Vchoreum & Sesostrimi xix. & xix. annos scilicet quingentos septuaginta intercessisse, cum interea præter Miridem nullus, qui Aegypto imperauerit, neq; à Diodoro ipso, neq; ab Herodoto non minetur. Cum autē Eusebius horū nusquam meminerit, aliorū meminerit, verisimile est à Manethone, quē ipse sequebatur, silētio fuisse præteritos, itēq; alios ab aliis: quorum fidem & scripta Herodotus ac Diodorus secuti sunt. Mirum certè, ut eo, vnde discessimus, redeamus, illud est, quod Herodotus Menam illum fuisse scribit, qui Memphis condidit, quam ab Vchoreo conditam fuisse Diodorus testatur, annis scilicet post Thebas, quæ in Aegypto erant, conditas iō x x x v. Eusebius autē ab Epapho Iouis & Ius filio Memphis conditam memorat, Græcorum commēta & fabulas secutus, apud quos tamen Epaphum fuisse Aegyptium confitentur omnes. Aiuntenim Io, post multos errores, in Aegyptum peruenisse, ibique à Ioue pristinæ formæ restitutam, & compressam peperisse Epaphum, à quo deinde Memphis originem habuerit suam. Quin etiam Herodotus Thalia scribit Apim bouem a Græcis vocari Epaphū, ut hoc huiusmodi nomine significetur vel homo aliquis certus, vel bellua, quæ apud Aegyptios sit. Quando etiam Pindarus Ode x. τῶν νεμίων multas urbes ab Epapho in Aegypto conditas fuisse testatur, cum ita canit. πολλὰ δ' αγύπτιων πατώνισθεν ἀσητῆς ἐπάφες παλάμαις. & quidem facilis est transitus ex Api in Epaphum, &

C 2 ab

temere à nobis fieri, si nonnulla de ea vrbe, in qua plurimos Obeliscos fuisse legimus, quasi aliud agentes dicemus; quæ tamen à re proposita longissimè non aberrabunt. Thebæ, quam Aegyptij louis vrbeam vocant, si Diodoro credimus, à Busiride secundo Aegypti Rēge cōditæ sunt. cuius vrbis circuitum CXL. stadia metiebantur, quæ sunt passuum decem & septem millia & quingenti, si octonis quibusque stadiis millos passus contineri statuerimus. magna in ea & pulcherrima ædificia, & sumptuosissima Deorum templo: aliaque vrbis ornamenta quam plurima, dignissima illa quidē, quæ omnes mirarentur. præterea priuatorum ciuium ædes, quarum aliæ quatuor, aliæ quinque contignationibus ac tectis constarent: tanta verò rerum omnium affluētia, ut non modò in Aegypto, sed ne in toto quidem terrarum orbe vrbes essent, quæ cum Thebis comparari possent. Quare Homerus cū Achillem pertinacissimè negantē inducit velle se cum Agamemnone in gratiam redire ita loquentem facit:

οὐ δὲ οὐα θήβας

Αἰγυπτίας, ὅθι πλεῖστα δόμοις ἐν κτήματα κέκτα

Αἴσ’ ἔκατόμπουλοι εἰσὶ διπλόσιοι δὲ αὖ ἐκάστην

Ἄνερες ἐξοιχένεσι σωὶς ἱπποισι καὶ ὄχεσφιν.

hæc ita, ut potuimus, latinè vertimus:

Nec mihi si dederit quidquid confertur in urbem

Thebas Aegypti, quarum domus omnis abundat:

Quæq; adeo centum portas præbere patentes,

Et quaque ex porta bis centum exire feruntur

Subli-



Sublimes in equis iuvenes, & curribus altis
 Sunt tamen qui putent Thebas nō ideo ἐπιτομές πόλεων
 dictas, quod centum portas haberent, sed quod multa,
 & magna templorum vestibula, quæ Græcè προπύλαια
 dicuntur, in ea forent: ideoq; vrbis cognominata fue-
 rit ἔκαρδιμων πόλεων quasi πολύπολος. ut sit numerus finitus
 pro infinito positus: sed hoc qualemque sit, illud pro
 comperto habetur, viginti millia curruum ex ea ad bel-
 lum exire confueuisse. centum enim equorum stabu-
 la inter Memphim & Thebas ad eam viam fuerunt,
 quia iuxta flumen ibatur: quorum singula ducentos e-
 quos capiebant. tātorum autem ædificiorum vestigia,
 & fundamenta vidisse se Diodorus testatur cum circi-
 ter Olympiadem CXX C. Cornelium Gallū secutus in
 Aegyptum se contulit, annis videlicet ante quām Ie-
 sus Christus liberator noster nasceretur, plus minus
 LVIII. Quæ tamen Vrbs tam opulenta, tamq; rebus
 omnibus & ad vitā necessariis, & ad incredibilem quā-
 dam magnificantiam ostendādam comparatis ornata,
 atque instructa cum esset, deserī à Regibus, simulatq.
 Memphis florere ac celebrari cœpta est. usque adeo, vt
 paucissimi superessent, qui eam incolerent. Hæc tam
 multa de Thebis à me dicta sunt, quò commodius eo-
 rum opinionem refutaremus, qui putant Obeliscos ad
 Pyramidum formam inuentos ac factos. Nam idem
 Diodorus testatur inter cætera propemodum infinita
 Thebarū ornamenta, qualia sunt tum dona ex argēto,
 auro, ebore Dijs immortalibus consecrata, tum innu-
 mera-

miserabiles Colossi, fuisse etiam Obeliscorum ex uno ac solido lapide constantium admirabiles substructiones. Quod si Thebae ante conditam Memphis amplius quingentos annos floruerunt, & Pyramides à Memphiticis Regibus excogitatae, atque extorta sunt, sine villa dubitatione concludi potest, multo ante fuisse Obeliscum, quam Pyramis fuerit. praeferimus, cum ex auctoritate Plinij, quemadmodum paulò ante ostendimus, constet à Mitte, qui in Solis urbe lōge vetustiore, quam Memphis, regnabat, Obeliscum fuisse adiumentum; Pyramidem autem à Chembete, qui Memphi multis post seculis regnum obtinuerit. Tempore igitur multo prior Obeliscus, quam Pyramis: & ut tempore, ita etiam dignitate, & veneratione superior. Nam praterquam quod mirabile est tam portentosam molem ex unico ac durissimo saxe excindī integrā potuisse, finis etiam, & caussa si spectetur, cur Obeliscus extiterit, videbitur esse Pyramidi longissimè præferendus. Miris enim Rex conficiendum curauit, ut quasi ex concepto voto Soli donum daret: in eoq. rerum à se gestarum memoriam Aegyptiacis notis p̄scriptam ad posteros propagaret. At Pyramides sepulchri caussa fuisse à Regibus substructas certo scimus. Quas quoniam diximus Memphiticorum regum fuisse inuentū ad sepulturæ usum, ut ex Diodoro, & Herodoto cognoscimus; & eotum quidem regum, qui multis post Memphis conditam ætatibus illic regnauerunt, Iosephum Historiæ scriptorem, si Eusebij calculus verus est, negligenter.

gentiæ condemnabimus: qui libro ij. Rerum Iudai-
carum, Hebræos afferat ab Aegyptiis regibus in exædi-
ficādis Pyramidibus occupari, ac defatigari solitos fui-
se. Id quod iuxta illum calculum nullo modo verū esse
potest. Mōsem enim natum esse ostendit Eusebius an-
te Memphis conditam annis fermè centum, isq; an-
num cum ageret octogesimum Hebræos ex Aegyptio-
rū seruitute liberauit: aliquot annis scilicet ante, quām
Memphis conderetur. vt hinc etiam eorum error intel-
ligatur, qui Pyramides Granaria fuisse existimant à Io-
sepho illo per antiquo Iacobi filio instituta ad annonæ
caritatem subleuandam, quam ipse somnium regis
interpretatus tanto ante futuram prædixerat. Sin autē
Eusebium in subducendo temporum calculo deceptū
esse statuemus, & recentiorum calculum veriorem esse
existimabimus, nihil erit cur de Iosephi fide dubite-
mus. quando ex eo calculo Memphis esse conditam
cōstat, quo tempore Iacobus Iosephi pater in Aegyptū
descendit, multis scilicet annis ante Mōsem natum.
Quāquam oblitus nō sum, Diodorū dicere, nō nullos
esse, qui Pyramides affirment annos ter mille quadri-
gentos & amplius ante Augusti ætatem, quo imperan-
te ipse historiam scripsit, fuisse exædificatas. id quod si
verum esset, duæ res in primis absurdæ consequen-
tur. Vna, Pyramides multis ætatibus ante Diluvium
fuisse: hoc est, ante mortem Noë annis CICCCCLV.
moritur enim Noas, si Eusebium sequimur, anno mū-
di CICCCCLIII. si alios CICCLVI. Ut vtrū-
uis

uis fuerit, necesse sit non modò multis ante Diluvii im annis Pyramides fuisse, sed etiam, si recentiorum calculum probamus, tum fuisse, cùm Adamus annum ætatis agebat suæ **I C L I I**. Vixit enim annos **I C C C C** **X X X**. Altera, quòd reges in Aegypto nulli cum essent, ædificatæ fuissent: & tamen constat eas Memphiticorum regum sepulcra esse . quibus regnanti bus nulli omnino Hebræi in Aegypto relicti fuerant: omnes enim multo antè in libertatem vna cum Mo se ipsorum Duce se asseruerant . Quare longè probabilius est, quod eodem in loco idem Diodorus ex opinione sua ponit, Pyramides scilicet substructas fuisse annis ante ætatem suam mille: ante Vrbem scilicet conditam **C C X L V I**. post captam verò Troiam **C L X X V I I I**. post Memphis conditam. **C C C X C**: vel **I O C C X I I I I**. quaratione satis superq; probatum à nobis videtur id, quod de Obeliscorum antiquitate, & de Iosephi historiarum scriptoris fide supradiximus. Atque ut omnes, quod volunt facile indagare per se queant, duplicem annorum mundi calculum subie cimus, alterum Eusebij, alterum recentiorum, qui ab Eusebio discedentes proprius ad veritatem accessisse existimantur.

D

Anni

Anni Mundi Eusebiani

2303	Noas nascitur
2803	Diluuum
3253	Noas moritur
3475	Iacobus Iosephi pater
3610	Moses nascitur
3708	Memphis conditum
4020	Troia capitum
4308	Phero Sesostris F.
4444	Vrbs conditum
5198	Christus nascitur
6783	Xystus V. Pont.

Anni Mundi recentiorum

1156	
1656	
2106	
2238	
2413	
2238	Quo tempore Iacobus in Aegyptum
2780	(descendit.
2818	LVIII. anno post Troiam captam.
3224	
3952	Vt hanc eadem esse & Augusti & Dio-
5537	(dori Siculi aetate intelligamus.

His ita in ordinem redactis, ad Obeliscum, vnde discelimus, reuertamur. Cum igitur aperte pateat & ex autoritate Plinij, & ex ipsius formae linearumq. æquabili dimensione tum primum Obeliscum, tum eos, quos postea ad eamdem rationem cæteri Reges fabricati sunt, Soli sacratos esse: tamen, vt hoc vniuersè verum sit, alijs etiam Diis separatè dicabantur. legimus enim à Rege Sesostride Obeliscos duos cætum viginti cubitorum Thebis Deo, qui illic præcipue colebatur, fuisse statutos. Deum autem illum Iouem else testatur Strabo lib. xvij. Geographiæ his verbis: ανατιθέσος δὲ τῷ ἑρμῇ πάσαν τὴν τοιάντινην σοφίαν. τῷ δὲ δί, οὐ μάλιστα τιμῶσιν οὐειδεστην, καὶ γένους λαμπρότατου παρθένος ιεράταν, ἀς καλέσων οἱ ἔλληνες παλλάδας. hoc est: Attribuerunt autem & consecrarent hanc omnem' huiusmodi sapientiam Mercurio. Ioui autem, quem maxime colunt, virgo consecratur, quæ & formosissima sit, & nobilissimo genere nata. huiusmodi autem virginis à Gracis nominantur Pallades. Duplex autem scribendi ratio apud Aegyptios in consuetudine fuit,

vt He-

vt Herodotus Euterpe, & Clemens Alexandrinus Stromate quinto nos admonet. vna quæ sacræ, altera quæ popularibus notis vteretur. & hanc quidem ἡμερολογιαὶ φύλων vocabant, scribendis scilicet epistolis accommodatam: alteram vero Hieroglyphicam, hoc est sacram dicebant, qua ἱερογραμματεῖς vtebantur. ij sunt rerū mysticarum interpretes, ac scribæ. Sacrae notæ, quæ dicebantur, vnius rei vnica pictura interdum vnum, interdum multa significabant, vt si vulturem pinxissent, intelligi rerum omnium naturam volebant: si apem, regem: si scarabeum, Solem: si Hippopotatum, impietatem: pietatem, si ciconiam: si canes duos, duo Hemispheria, vel tropicos duos: Solem autem cū morbos infert, si accipitrem. Qui mos ad Græcos etiam, atque adeò ad Barbaros transiit. Nam Græci quidem cum signa & sculpturas illas Aegyptias omisissent, breuibus quibusdam dictis plurima comprehendebant. cuiusmodi erat oracula, vnde Apollo λοξίας, idest obliquus, & quasi flexuosus est cognominatus: & sapientum præcepta: Nosc te ipsum: Tempori parce: A fabis abstineto: Super terram ne nauigato: & alia sexcenta, quæ breuissima cum sint, multarum rerum congeriem complecti solent. Barbari autem Aegyptiorū consuetudinem seuti quibusdam animantium imaginibus animi sensa expresserunt, vt Idanthuras Scytharum Rex, qui ad Darium traiecit Istro bellum minantem eas litteras misit, in quibus murem, ranam, auem, iaculum, aratrum pinxerat: neque ullum ver-

D 2 bum



bum præterea addidit. è quorum animantium figuris
alij Scythes imperium Dario tradituros interpretaban-
tur, quod ex mure domos, ex rana aquas, ex aue aerem,
ex iaculo arma, ex aratro regionem significari diceret.
alij non posse Scytharum tela à Persis evitari, nisi illi è
Scythia tanquam aues euolarent, aut terram, aut aquam,
tanquam mures & ranas subirent. Hæ igitur notæ bre-
uissimum locum ad multas res significandas postula-
bant: quod fieri minimeliciusset, si popularibus & ad
epistolam sribendā aptis notis vteretur: quæ cum plu-
res sint, & ad exprimendum animi sensa necessariò ad-
hibeantur omnes, profectò ad tot res percéndandas nul-
lius Obelisci latera sufficissent, in quibus & Regum il-
lorum opes, & copiæ prescribebantur; & quas ipsi na-
tiones deuicissent, & quos ad fines imperium propa-
gassent, & quemadmodum Scythes, Baetrianos, Indos,
& Iones armis debellauissent, & in ditionem potesta-
temq; redigissent suam. Addebat præterea & vecti-
galium magnitudo penè incredibilis, & militum mul-
titudo inæstimabilis, & alia huiusmodi permulta, quæ
Regibus illis opulentissimis, ac potentissimis videren-
tur. Quæ nisi sacris illis notis vni essent, nunquam tam
exigua ac breui vnius litteris area complexi fuissent, si
præfertim grandiores notas, quò facilius legi possent,
quemadmodum fieri solet, incidi curauissent. Dupli-
cem igitur usum ex se pariebant Hieroglyphicæ notæ:
vnū, quod supra est à nobis demonstratum, cum Theo-
logiæ seu Philosophiæ arcana contegebant, eaque iis
dun-

duntaxat patefaciebat , qui sapientiā omni conatu appeterent: alterum, cum paucis imaginibus longam rerum ac verborum seriem completerentur . Quod, vt quām verē à nobis dicatur, intelligi possit, subiiciemus hic ea, quæ notis Aegyptiacis descripta legebantur in latere Obelisci vetetis, qui erat in Circo maximo positus . Nam si eadem litteris, aut Græcis, aut Latinis exarari quis ibidem voluisset, nā ille longè latiorem campum frustra quæsiuisset. Verba autem illic Aegyptiacē inscripia, Græcē olim interpretatus est Hermapion, quæ nos ad hanc rationem latina fecimus .

A parte Australi.

Hæc sunt, quæ Regi Rhamesti donauimus, quem totum terrarum orbem gubernans Sol & Apollo amat, fortis veri amator Heronis filius, ex Deo genitus, conditor orbis terræ, quem Sol selectū habuit, fortis Martis Rex Rhamestes, cui cum fortitudine & audacia subiectus est totus terrarū orbis, Rex Rhamestes Solis filius immortalis .

Ordo secundus.

Apollo fortis, is qui reuera dominus est diadematis, & Aegyptum gloria à se cumulata possedit, is qui Solis urbem Splendidam fecit, & reliquum orbem terrarum condidit, & ingenti honore prosecutus in Solis urbe Deos collocatos ac positos, quem Sol diligit.

Ordo tertius.

Apollo fortis Solis filius, totus lucidus, quem Sol selectum habuit, & Mars strenuus donauit: cuius bona omni tempore permanent: quem Ammon diligit, cum donarijs exple-

expleuerit Phœnicis delubrum, cui Dei vitæ tempus largiti sunt. Apollo fortis Heronis filius Rex orbis terrarum Rhamestes, qui seruauit Ægyptum, postquam aliam gentem superauisset, quem Sol amat, cui longū tempus vitæ Diꝝ largiti sunt, dominus orbis terrarum Rhamestes longæuus.

Alius ordo secundus.

Sol Deus magnus dominus Cœli, largitus sum tibi vitæ satietatis expertem: Apollo fortis dominus diadematis incomparabilis, quorum signa dedicaui in hac regia, dominus Ægypti: & exornauit Solis urbem itidem & ipsum Solēm dominum Cœli, una confecit opus bonum Solis filius Rex longæuus.

Tertius ordo.

Sol Deus dominus Cœli Rhamesti regi largitus sum potentiam, & in omnes dominatum, quem Apollo veri amator dominus temporum, & Vulcanus Deorum pater selectum habuit propter Martem Rex longe gratissimus Solis filius, & à Sole amatus.

A parte orientali primus ordo.

Magnus à Solis vrbe Deus cœlestis Apollo fortis Heronis filius, quem Sol educauit, quem Dei honore prosecuti sunt, qui vniuerso terrarum orbi dominatur, quem Sol selectum habuit, inclytus propter Martem Rex: quem Ammon amat: & is qui totus collucet, longæuum Regem esse iussit.

Hæc huiusmodi leguntur apud Ammianum Marcellinum. qui Græca maluerit, ex eius libro xvij. petere poterit. Quoniam vero idem auctor ad ipsius inscriptionis finem addit & reliqua, facile intelligimus eam inscri-

inscriptiōnēm esse multō lōgiorem. Quamquam etiā idem existimari potest ex ipsa Epigrapha à parte orientali : quam cū neque secundus, neque tertius ordo con sequatur, necesse est multa fuisse ab Ammiano prētermissa, quæ & Aegyptiacè in ipso Obelisco & Græcè apud Hermaphionem legebantur. de quaquidē re quid attinet dubitare? cum idem Ammianus dicat in omnibus Obelisci lateribus fuisse incisas Hieroglyphicas notas ; nunc autem eas tantum interpretatas, & excriptas videamus, quæ in parte Obelisci ad Austrum ver gente sculptæ fuerant. Nam, quæ partem septentri onalem spectabant, nullę omnino representatæ sunt, ac ne illæ quidem, quæ partem Obelisci occidentalem oc cupauerant. Cæterum quod ad Rhamestem pertinet, cui Obeliscus est inscriptus, nullam eius mentionem apud Herodotum aut Diodorū reperio. Eusebius Rhamisem in Aegypto regnauisse sexaginta sex ipsos annos testatur: nimirum ab anno mundi ^{CICICICICIC} CCCXXC. ad annum ^{CICICICIC} CCC,CXVI. Plinius vero Rhamisem scribit Aegyptiis imperauisse, quo tempore Ilium captum est. id autem accidit anno mūdi ^{CICICICIC} CX. ut quod ad Plinium & Eu sebium pertinet septuaginta quatuor annorum tātum differentia intersit, quam in tanto téporum cursu nul lius esse momenti iudicamus. Et sanè verisimile est, hunc Rhamisem Plinianum cūdem fuisse cum Rhamese Eusebiano, & cum Rhameste, cuius in Augusti Obelisco, qui in circo fuerat positus, sit mentio: quā do &

do & in eadem fermè tempora incurunt, & idem nomen est, si ex Rhameste vnicā litteram demperis, aut si Rhamesi eamdem addideris. Videmus enim ab auctōribus Barbarorum Regum nomina non iisdem litteris exarari^o, neque pronuntiari eodē vocis sono. Herodotus & qui eum consecuti sunt latini scriptores Sesostrim vocant, quem Diodorus Siculus Sesoosim nominat. Huc accedit coniecturæ nostræ non tenue argumentum, quod Rhamestes in superiore Obelisci inscriptione longæuus appellatur, Rhameles autem cum sexaginta sex annos imperauerit, valde senem fuisse eū oportet cum mortuus est. Neque obstat quod Rhameles Zeto in imperio successerit, Rhamestes vero Heronis filius fuerit. etenim fieri potuit, ut Rhamestes, seu tu Rhameles dici malueris, vel ex priuata domo ad regnum peruerterit, vel in eius patris nomine variatū ab auctōribus fuerit. quamquam Heronis nomen inter Aegyptiorum regum nomina ab Herodoto numeratur, ac Sesostridis filius fuisse prohibetur, qui terrarū orbem propè totum victoriis peragrauerit suis, sic ut Colchos etiam & Scythas etiam in ditionem potestatemque Aegyptiorum regum redegerit. vnde Valerius Flaccus libro v.

*Nec minus hic varia letatus imagine templi
Ad geminas fert ora fores, cunabula gentis
Colchidos hic, ortusque tuens: ut prima Sesostris
Intulerit Rex bella Getis: ut clade suorum
Territus hos Thebas patrium querens, at ad amnem:
Phasi-*

Phasidis hos imponat agris, Colchosque vocari
Imperat: Arsinoen illi, tepidaeque requirunt
Oria leta phari, pinguemq; sine imbribus amnem.

Et Lucanus:

Venit ad occasum mundi q; extrema Sesostris,
Et Pharios currus regum ceruicibus egit.

Sesostrim enim in tantam ferociam, atque arrogan-
tiam processisse legimus, ut Reges, quos sorte duci iu-
bebat, singulis annis ad currum iungeret, seque ab iis
per urbem triumphantem vehi iuberet. quibus versi-
bus hos, qui sequuntur, idem Lucanus subiicit:

Ante tamen vestros amnes Rhodanumque Padumq;
Quam Nilum de fonte babit

Ex hoc igitur Sesostride natum esse illum cōstat, quem
Obelisci inscriptio Heronem, Herodotus Pheronē vo-
cat, secutus scilicet veterum Græcorum dialectum, qui
vocibus à vocali incipiētibus digamma Aeolicum ad-
debāt. Itaque Helenam Felenam: Hormias Formias:
Hebrim Febrim: Halesum Falesum, & inde Faliscos &
avēpa, & ἀντα, & ὄνον Favēpa, Fāvanta & Foīnoy dicebant:
quod & Seruius Grammaticus ad illud ex septimo Ae-
neidos. Æquosque Faliscos. Et Dionysius Alicarna-
seus lib. pri. cum de Velialoquitur, testantur. Itaque,
ut mihi quidem videtur, non ineptè existimari potest,
eumdem esse Obelisci superioris Heronem, & Herodoti Pheronem, quando vtrum vis dixeris, idem dixe-
ris. & fortasse idem est cognomen Aegyptiorum Re-
gum, quos Moses in libris suis Pharaones nuncupat,

E

nos



nos autem Cæsares & Augustos appellamus. quam coniecturam confirmat Diodorus Siculus cum eum , quem ab Herodoto Pheronem nominari diximus, ipse Sesostrim Sesostridis filium vocat . Sed in tanta rerum obscuritate cum aliud nihil occurrat, quod sequamur, præter coniecturam ; vnicuique facile concedemus , vt illud probet, quod ipse in primis probabile esse iudicabit. si Aegyptiorum Sacerdotum commentarij vna cū imperio non periissent , nihil profecto foret, quod magnopere laboraremus . Nunc amissis Regum illorum successionibus, & perturbata temporum serie, quis est, qui quidquā pro comperto statuere possit? Ergo vt ad Obeliscum redeamus, ex inscriptis notis constat Rhamesti Regi dicatum fuisse, aut certè à Rhameste rege qui cumque tandem is fuerit, Soli donum datum : à quo Reges Aegyptij, natura videlicet leues , & inani fastu elati, ac tumidi, quemadmodum Adrianus Imperator in epistola quadam sua ad Seruianū Conf. de omnibus Aegyptiis scriptum reliquit, diligenter, atque amari gloriabantur, & Solis ipsius filij existimari volebant, quorum amentiam imitatus est Alexander Philippi filius cognomento Magnus ad eos profectus, & ab Ammonis sacerdotibus Iouis filius appellatus . Nam ita se postea non solūm vocari passus est, sed etiam iuslit. Atque hæc quidem vanitas cum ab Aegypto emanauisset, longè lateq. postea perutagata est. Nam & Arsacidæ Persarum Reges Solis se & Lunæ fratres appellabant: & Ptolemæus Ceraunij cognomine delectabatur : & An-

tigo-

tigonus ab Hermodoro Rhetore Solis filius est dictus. nec minus Syriæ Rex. Antiochus supra hominis conditionem sese efferens Deus vocari voluit: Domitianus autē & Caius Caligula, vt nostros etiam attingamus, & optimi maximi, & latiales Ioues ex ipsorum iussu cōsalutati sunt'. Mirum igitur esse nō debet, si Reges suos Aegyptii modo Apollines, modo Solis filios vocabant. Etenim p̄cipue Solem colendum & adorandum arbitrabantur, quem & lucis auctorem, & rerum omniū parentem existimarent. videbant enim nihil esse in rerum natura, quod ab eius calore non procrearetur, ac vitam nanciseretur suam. Quā nobrem in eam mentem adduci me facilè patior, vt Mitrem, quem nos ex auctoritate Plinij primum Obeliscum adinuenisse diximus, in Aegypto cum regnaret, Regē fuisse putem, qui se Solem appellari voluerit. Mitres enim Solem significat Persarum voce, vt quidam arbitrantur, vt nos, Aegyptiorum. Quando ab Aegyptiis omnem Deorū cultum, & omnes omnium superstitiones, & ceremonias ad reliquas orbis terrarum partes emanasse cōstat, ac pr̄sertim ad Persas, apud quos Solē in summa veneratione habitū esse atque adeo etiā adoratū nemo ignorat. Cum igitur & ab Aegyptiis idem fieri consueuisse sciamus, & Aegyptum diuinarum ceremoniarum & religionum omnium quasi quoddam seminarium suis scriptores tradant, & in ea Regem Mitram regnum obtinuisse Plinius afferat, verisimile est, huius modi vocem ab Aegyptiis potius, quām à Persis originem habuisse.

buisse. Cum præsertim Phœnices hoc nomine usus esse videamus. Seruius Grammaticus ad illud ex primo Aeneidos: *Huic coniux Sichæus erat.* Quoties (inquit) poetæ aspera inuenit nomina, vel in metro non stantia, aut mutat ea, aut de his aliquid mutilat. nam Sichæus Sicharbas dictus est: *Bulus Didonis pater Mithres.* hæc Seruius. Scimus autem Didonem ex Urbe Tyro, quæ totius Phœniciaæ Emporium erat, & finibus suis Aegyptum propemodum attingebat, in Africam se contulisse. in qua Carthaginem condidit. Cæterum de Mithre, idest de Solis cultu, à Lactatio grammatico in extremo primo commentario in Statij Thebaidem nonnulla dicuntur, quæ scitu digna cum sint, hoc in loco prætermittere noluimus. versus autem quos interpretatur, quosq. ab Adrasto Arguorum Rege hymnum Apollini canente referri Statius facit, i. sunt:

*Adsis è memor hospitij Iunoniaq. anua
Dexter ames: seu te roseum Titana vocari
Gentis Achæmenia ritu, seu prestat Osyrim
Frugiferum: seu Persæi sub rupibus antri
Indignata sequi torquentem cornua Mitram.*

Ad quæ verba ait Lactantius, Apollinem à varijs genibus variis nominibus fuisse cognominatum: ab Achæmeniis scilicet Titanem: Ab Aegyptiis Olyrim: Mitram à Persis, apud quos ad hanc rationem coleretur. Leonē fingebat Persica veste induitum cum tiara, qui utraque manu reluctantis Tauri cornua comprimeret, & con-torqueret, idque signum in antro conclusum religiosè cole-

colebat. quod leo Solem, talus Lunam significaret.
quæ lucem à Sole cum mutuetur, quantoq; longius ab
ipso absit, tanto magis ipsa luceat, reluctari quodam-
modo videtur, & omni conatu obniti, ne cū Sole con-
iungatur, aut coniunctacum sit, ne diutius in eostatu
permaneat, in quo neque ipsa à nobis videri possit, ne-
que Solem interdum videri patiatur: cum scilicet inter
Solem & aspectum nostrum ipsa se interponit. Ideoq;
in antro non subdio vna cum Sole colebatur. Mitram
igitur cum constet solem esse, & id nomen ab Aegy-
ptiis regibus usurpatum; constare etiam par est, cur in
vetere Obelisco Rex Rhamis, modo Apollo, modo
Solis filius nominetur. quando Aegyptij Solem, ab
Apolline diuersum esse uoluerunt. hoc est Solem pa-
trem, Apollinem filium ἀληγορικῶς significantes Só-
lem vi sua facultatem in hominum animis, atque adeò
in ipsius terræ visceribus diuinatricem procreare: quā
veteres Apollinem vocauerunt. Itaque oracula nō So-
li, sed Apollini tribuebantur, vt Apollinem inde Solis
filium, non imperite nominauerint. Cæterum quod
ad Obeliscos pertinet, vt ad rem propositā reuertamur,
Mitres, quemadmodum supra dictum est, omnium
Aegyptiorum Regum primus in Solis urbe, quam etiā
Heliopolim vocant, ubi ipse regnabat, Obeliscum in-
stituit, in eoque incisis Aegyptiacis notis testatus est,
id esse ab se factum, quod vt faceret in somnis admo-
nitus fuisset. hunc postea consecuti alij Reges in eadē
urbe alios Obeliscos statuerunt: inter quos Sochis, cu-

ius



ius etiā meminit Strabo lib. xvi. Geographiæ, quatuor omnino numero statui curauit. Quorum longitudinem quadragenis octonis cubitis metiebantur. Rhamis verò, quo regnante Ilium captum' fuisse scribit Plin. duos, quorum prior altitudine quadragenum cubitorum, posterior vnde centenum pedum, latitudine autē cubitis quatuor. quo quidem in loco cum Plin. dicat Rhamitem digressum inde, ubi fuit Mneuidis Regia, eum Obeliscum, de quo proximè loquebamur, posuisse, quae de huiusmodi loco mihi in mentem veniant proferre, & cum aliis communicare nō pigebit, ut statuere possimus locus hic in rege ne sit, an mendosus. Strabo igitur lib. xvij. scribit Mneuidi bouem esse, quem Memphis Apim vocent, eumq. & coli ab Heliopolitanis, & Deum haberi, illiq. septum attributum esse, in quo publicè aleretur. Quare aut Mneuidis Regiam pro septo illo accipi oportet, aut loco Mneuidis reponendum est Memnonis, de cuius Regia sic idē Strabo: ἡπέρ δὲ τάυτης οὐδὲ βούσι, εἰ δὲ τὸ μεμνόνεον βασίλειον θερμασώς κατεπικασμένον ὀλόνιδον τὴν αὐτὴν κατασκευὴν πέποτο λεβήτηριδον ἔχομεν. εἰ σολλαπλοῦ δὲ hoc est. Supradicte est Abidus, in qua Memnonis est regia, mirabiliter substructa, et scilicet ex lapide: quemadmodum labyrinthū esse diximus: sed tamen nō tam multiplex. Ac de hac quidem Regia idem Strabo non ita multò post, se hæc & audisse & vidisse testatur, cum eò Cornelium Gallū secutus esset, esse scilicet illic Colosso duos, quorum alter terræ motu corruiisset; alterum, qui adhuc stās integreret

teger seruaretur, semel singulis quibusque diebus sonitū edere, quasi percussum, ab ea videlicet parte, quæ basi proxima est; eumdemque se inaudisse circiter diei horam primam, cum illuc eius miraculi causa se contulisset: in quo tamen dubitare se fatetur, utrum is sonitus sponte ab ipsa statua edatur, an aliquo eorum hominum artificio: cum verisimile non sit ex lapidibus ita coagmentatis, nulla extrinsecus accedente vi, crepitum fieri. Quamquam Cornelius Tacitus homo aliqui parum superstiosus, & nihil omnino religionibus addictus, de eadem statua sic loquitur, verum ut esse existimare videatur, quod vulgo homines asserebāt: vocalem scilicet sonum reddere, vbi Solaribus radiis iacta esset. De quoquidem miraculo Plinius lib. xxxvi. cap. vii. sic scribit: *Non absimilis illi narratur in Thebis delubro Serapis, ut putant, Memnonis statua dicatus. quæ quotidiano Solis ortu contactum radj̄s, crepare dicunt. & Iuuenalis etiam Satyra xv. Dīmidio magice resonant vbi Memnone chordæ.* Quoniam autem ex eodem Strabone Memnonis regiam Thebis fuisse constat, & hoc in loco Plin. de Thebaicō Obelisco loquitur, facile in eā opinionē venio, ut pro Mneuidis, reponi debeat, Memnonis: cū præfertim Mneuim ἐν τῷ οἴνῳ, idest in septo, non ἐν τῷ βασιλεῖ, idest in Regia ali confueuisse scimus. Discessisse igitur Rhamisem Heliopoli, & Thebas se contulisse intelligere nos oportet, vbi prope Memnonis regiam, vel in ipsa regia Obeliscum illum statuerit: in cuius altitudine tradenda suspicor Plinij

verba

2001



verba esse corrupta. Quomodo enim fieri potest, vt is
lapis Obeliscus sit, cuius latera in senos pedes pateant,
altitudo in vndenos tantum assurgat? & quoniam fa-
ciliis lapsus est in numeris, in quibus & apud Plinium,
& apud alios erratum saepissime deprehendimus; non
temere fortasse à nobis fiet, si pro vnde cenis, vnde cen-
tenis reposuerimus. sic enim fiet, vt eius altitudo sexaginta
sex cubitorum sit, latitudo quatuor. Et ita etiam
locū Pliniū legit Polydorus Virgilius. quod à me post-
quam locum restituissim, anim aduersum est. Et sanè
ridiculum foret in tantulo opere XX M. hominū fuisse
defatigata, quemadmodum Plinius testatur esse factū.
cum mirum etiam videri debeat in Obelisco sexagenū
senum cubitorum faciendo, tot millia operarum fuisse
ab eo Rege adhibita, vt ad eius calculi rationem in
Caiano Obelisco excindendo & conformando triginta
millia trecenti triginta tres & amplius homines se
exercuerint. erat enim centenum cubitorum, antequā
frangeretur, vt suo loco demonstrabimus. Illum autē
tanti sibi esse faciendum Rex existimauit, vt, cum ab
Architectis atque Artificibus esset statuendus, verere-
turq. ne tanto ponderi substollendo ac substituendo
machinæ, quæ adhibebantur, non sufficerent, molesq.
illa collapsa frangeretur, ad ipsius Obelisci apicem fi-
lium suum adalligari iusserit, cuius tanti periculi me-
tu architectis iniecto, intētiore cura salus lapidis ab il-
lis procuraretur. quod & factum est. Ex quo pater,
quanto in honore huiusmodi moles apud Aegyptios
reges

reges haberetur, quantumq. illi errare videantur, qui Obelisco Pyramidis nomen imponunt; cum Obelisci inter dona, quæ Diis immortalibus dabantur in templis statuerentur, & ἀναθήματα à Græcis vocarentur; Pyramides vero inter regum sepulchra numerarentur; quarum aliæ tribus, aiiæ quatuor lateribus, & iis omnibus modò inter se æqualibus, modò inæqualibus constarent sic, ut nonnullæ latitudine contractiores essent, longitudine porrectiores; omnes autem à latissima basi surgerent. Obelisci verò eadem semper forma, hoc est quadrangulari fingerentur, atque ab infima sui parte minus ampli & spaciosi cum existerent, ipso aspetto pulcherrimi videbantur, & omnium admiratione & cultu dignissimi: id quod in obelisco, quem in area Vaticani Xystus V. Pont. Max. statui iussit, aspiciendo sic experimur, ut ab eo oculos auellere ac reuocare nequeamus, indeq. illud, quod vetere proverbio iactatur verissimum esse intelligamus. nam quæ tanta ac talia opinione omniū existimabātur, vt ab omnibus laudari, & sempiternæ memoriarē mādari mererētur, ea οὐελίσκου dicerētur. Quāobrē Cambyses, qui Aegyptū aggressus Dijs hominibusq. bellum indixerat, & cuncta igne, ac ferro sibi illic esse deuastanda statuerat, cū Thebas expugnaret, atque incendium, quo ædificia conflagrabant, ad Obelisci crepidines peruenisset, ne tam præclara atque adeò adfábrefacta moles excocta collaboreretur, ignem extingui iussit: & quorum vitę nō pepercerauit, corum operi pepercit, aut religione impedi-

F
tus,

tus, aut, ut cum Plinio loquar, tam eximiae molis reue-
rentia commotus. Quamquam aliter omnino Stra-
boni visum est, qui Cornelium Gallum in eam prouin-
ciam ab Augusto missum secutus Aegyptum peragra-
uit, omniaque diligenter inspexit, & nobis fideliter
enarravit. Eius hæc sunt verba ex XVII .lib. Geogra-
phiæ in hunc locum à nobis translata: *Nunc autem ea*
vrbs (de Heliopoli loquitur) planè deserta est, in qua
templum visitur veteræ Aegyptiorum more exædificatum:
quod quidem permulta cùm insanæ, tum impietatis, qua
Cambyses præditus fuerat, indicia præsefert: quippe qui
partim igne, partim ferro templo omnia circumcidès, atque
amburès deuastabat: quemadmodum etiam Obeliscos, quo
rum duo Romam delati sunt, non omnino illi quidem malè
habiti ac protriti: alijs verò in eadem vrbe ac Thebis, quæ
nunc Diopolis, id est Iouis vrbs, appellatur, partim stantes
& vehementer ab igne ambesi, partim humi iacentes con
spiciuntur. hæc Strabo. ex quibus constat, nullos fermè
huiusmodi Obeliscos Romam fuisse ex Aegypto adue
ctos, qui non essent aliqua ex parte læsi. Quamquam
postea (ut par est credere) Imperatorum, qui inuenen
dos curauerant, iusu ac diligentia, quantum ab artifi
cibus fieri præstari que potuit, in pristinam formam
dignitatemque restituti. Scribit idem Plin. alterum à
Smarre, alterum ab Heraphio nullis inscriptum notis
positum; quorum vterque esset quadragenum octo
num cubitorum, eiusdem scilicet longitudinis, qua is
est, quem in Circo suo Caligula statuit. De Smarre au
tem,

tem, atque Heraphio Aegypti regibus, nihil quod sciā, ab auctoribus memoriae proditum est: nisi si eumdem else Marrem, & Smendim velimus, quem Eusebius viginti sex annos Aegyptiis imperauisse scribit, ante Aegyptum videlicet a Cambyle captam, & in seruitutem redactam annis plus minus quadringentis septuaginta. legimus præterea Nectabim regem ingētis magnitudinis, nimirum octoginta cubitorum Obeliscū excidisse, in eoq. nullas notas incidi curauisse, quem Aegypti rex is, qui libros diuinam scripturam complectētes ex Hebraico in Græcum sermonem per septuaginta interpretes ab Eleazaro Iudæorū Pontifice Hierosolyma euocatos, & in bibliotheca penè innumerabilibus cuiuscumque facultatis & scientiæ libris à se instructa habuit, Ptolemæus inquā Philadelphus Alexandriæ in Arsinoe munus amoris erga coniugem, eademque sororem suam Arsinoen statuit. Quamquā indeuehenda in eam urbem, statuendaque tam ingeniti mole, multo magis laboratum fuit, quam in excindenda. Sunt enim qui dicant à Satyro architecto: unica rate Alexandriam adiectam: alij à Phœnice fossa usque ad eum locū, ubi excisus Obeliscus iacebat, è Nilo producta, duas naues in latitudinem patulas ædificatas esse, quarum utraque eiusdem ponderis pedalibus lapidibus onerata Obeliscum utrinque extremis partibus suis ripas coniungentem subiret: atque ita cum subiisset, lapidibusque illis egestis, quibus ad iustam mensuram perinde atque ab Obelisco deprimebatur, alle-

ilogil

F 2

uata



uata esset, Obeliscum exciperet, deueheretque, quod
deuehi oporteret. Illum postea Maximus quidam pre-
fectus Aegypti Alexandriæ in forum iussu translatum
suo statuit, cacumenque recidit, ut auratum fastigium
adderet, quod tamen postea non fecit. In eadem vrbe
duo in portu ad ædem Cæsaris quadraginta duorum
cubitorū positi sunt, quos excindi curauerat Rex Aegy-
pti Mesphees, quem arbitror ab Eusebio Mephrem no-
minari. is ab anno mundi **MCMXXXVI.** ad tria
millia quingéta quadraginta octo in Aegypto duode-
cim annos regnauit, annis scilicet ante Cæsaris domi-
natū mille sexcentis quatuor. eorum alter humi de-
iectus & comminutus est, alter etiam nunc in eodem
loco (ut ferunt) erectus cōspicitur, in quo primum sta-
tutus fuerat. Cæterum quod ad Obeliscorum magni-
tudinem pertinet, omnium maximi duo Thebis vi-
bantur à Sesostride excitati, centum viginti cubitorū
altitudine, & Deo qui illic præcipue colebatur (ut in-
quit Diodorus) dedicati. eum autem fuisse Iouem ex
Strabone diximus. in ijs vero Sesostris & copiarum ma-
gnitudinē & vectigalium multitudinem, & earum na-
tionum numerum, quas armis debellauerat, & in po-
testatem redegerat suam, notari inscribique curauerat.
cui cum in Regnum successisset Phero, sic enim ab He-
rodoto appellatur: quamuis auctore Diodoro ipse se
Sesostridem ex patris nomine, ut supra diximus, cognos-
minari voluerit, duos & ipse Obeliscos fecit altitudine
centum cubitorum, latitudine octo: eosq. in vrbe He-
lipoli

Heliopoli statuit Soli cohæertos: cuius rei cauissam Herodotus, & item Diodorus percensent, fabulosam illā quidem, sed quae veterem Aegyptiorum sacerdotum ac Regum superstitionem nobis mirificè ante oculos ponat. Excreuerat Nilus ad inusitatam magnitudinē, & agros vndique aquis multo maioribus, quam quē admodum quotannis statis diebus facere cōsueisset, circumfusis occupauerat. Phero itaque in amnem iaculum contorsit, ob quod impiè commissum facinus oculis excæcatus est. cūmq. nihil à medicis excogitari posset, quo visum recuperaret, ad implorādām Deorum opem configuit: quos tam si complutibus sacrificiis, atque omni cultu nouem ipsos annos propitios sibi reddere perseuerasset, numquam tamen quidquam impetrare potuit, quamobrem à tanta calamitate liberaretur. decimo tandem anno admonitus ab oraculo est, vt & Deum quem Heliopolitani colerent, piè sancteque veneraretur, & alicuius fœminæ lotio faciem sibi purgaret & laueret, quæ cum viro tantum suo confutudinem habuisset, ergo ille factō ab uxore sua initio cum multas frustra expertus esset, vnam tandem cūdam olitori nuptam adinuenit, à qua sanatus est, eāq. ille recuperato visu postea uxorem duxit; cæteras omnes vno in loco concremari iussit: quem locum Aegyptij ē re nata sacram Glebam nominarunt. & Phero, vt se memorem accepti beneficij testaretur, Deoque gratias ageret, quas posset maximas, iuxta præceptum oraculi duos Obeliscos Heliopoli ex solido atque unico la-

pide



pide excisos & conformatos, de quibus paulò ante lo
quebamur, consecrauit: qui cum ingentes essem, mi-
nores tamen viginti cubitis erant ijs, quos eius pater
Sesostris Thebis exerat: quos si cum eo, qui in Circo
Caij & Neronis positus fuerat, comparemus; sexqui-
duplo maiores adinueniemus, vix ut credibile sit, tam
ingentis ac portentosæ magnitudinis saxū ullo ex mon-
te excindi potuisse. Eorum autem, quos à Pherone fuisse
solidatos diximus, neutrum, si Plinio & Ammia-
no fidem habemus, Augustus Romā detulit, sed utrū-
que vel religione, vel molis magnitudine impeditus
ac deterritus reliquit: nam quem ille ab Heliopolita-
nis acceptum, & in urbem deuectū in Circo Maximo
statuit, à rege Semneserteo excisum fuisse testatur Pli-
nius: quo regnante Pythagoras in Aegypto fuit. Seso-
stris autem & Phero eius filius annis ante ducentis se-
xaginta Aegyptiis imperarunt. præterquā quod Phe-
ronis Obelisci centum quinquaginta pedum, hoc est
centum cubitorum fuerant: Augusti autem Obeliscus
in Circo positus centum viginti quinque pedum &
dodrantis, præter basim eiusdem lapidis: nisi forte su-
spicemur Diodorum & Herodotum in metéda Obe-
liscorum altitudine etiam bases complexos esse. Qua-
ratione non omnino inter se illi ac Plinius dissentire
videlicet. sed huic coniecturæ vehementer refraga-
tur, quod Pl. Victor hunc Obeliscum in Circo Maxi-
mo ab Augusto positum esse scribit pedum octoginta
octo fenis; alterum autem, de quo paulò post dicendū
est,
sbiq

est, pedum centum triginta duorum: quod si Plinium cum P. Victore idem dicere velimus, necesse est, ut Plinianæ metrisuræ basim adiiciamus altitudine sex pedum & quadrantis: quæ basis cum depresso omnino sit, quā tantam molem deceat; non video, quid hac in re aliud afferri possit ad huiusmodi scriptores interf se conciliandos, quā opinari aut non eiusdem magnitudinis pedes apud Plinium & Victorem esse, quod ridiculum est; aut, quod facillimum est, numerorum notas apud alterutrum, vel etiam apud utrumq; à librariis fuisse corruptas. Vt cumq; igitur sit, Augustus duos Obeliscos Romæ statuit, alterum in Circo Maximo à Semneserteo rege excisum, quo regnante Pythagoras, vt diximus in Aegypto fuit, si Pliniū sequamur; nam Eusebius non Semneserteum, sed Anamasim in Aegypto regnauisse, tum scribit, cùm eò Pythagoras se contulit: alterum in Campo Martio, quem Sesostris, vt ille inquit, exciderat, eumq; nouem pedibus minorem fuisse testatur, hoc est pedum centum sexdecim, & quadrantis. atque hic etiam Plinius à Diodoro longissimè discedit. quippè qui, vt supra diximus, Obeliscos duos à Sesostride positos scribat centenum vigenum cubitorum, hoc est pedum centum sexaginta, maiorem scilicet hoc nostro Pliniano pedibus quadraginta tribus & quadrante; quem si Sesostris fabricatus est, aut alium ab iis duobus fuisse oportet, cuius nullam fecerint mentionem neque Herodotus neque Diodorus; quando ne illorum quidem duorum, quos statuit Sesostris Herodo-



rodotum usquam meminisse videmus: aut alterius regis fuerit necesse est; cuius in tradedo nomine vel Plinius errauerit, vel librariorum culpa mendum insederit. Ceterum cuiuscumque fuerit, nam à Sesostride excisum adduci non possum, ut credam; quando illum Regem gloriae appetentissimum fuisse legimus, usque adeo, ut inscriptos victoriarum suarum cippos innumerabiles reliquerit, & se totius orbis terrarum dominum appellauerit; quare verisimile non fit, eum hanc unam in re sic se gessisse, ut à superioribus Aegypti Regibus vinceretur. Sed tamen cuiuscumque fuerit inscriptam habebat, quemadmodum etiam is, qui in Circo Maximo ab Augusto fuerat positus, præter rerum naturæ interpretationem, & philosophiae documenta res planè diuersas ab iis, quas in altero Obelisco posterius in Circum maximum inuecto Aegyptiis notis incisas supra demonstrauimus, sui etiam usum admirabilem ad deprehensiones Solis umbras dierumque ac noctium magnitudines præstabat. Nam cum Romani veteres Hetruscos imitati initium diei à media nocte ordinentur, eumque meridie, idest sexta diei sequentis hora terminarent, ac propterea fieret, ut in duodenas horas & nox & dies diuideretur, ipsæque horæ essent inæquales, prout Sol ab æquinoctiis vel propriis, vel longius discederet; necessariò sequebatur, ut quota hora esset ex umbris vel decrecentibus vel augecentibus deprehenderetur. Neque enim quisquam tam hebes est, qui nesciat solstitialium dierum sextam horam breuissimam umbra

-ODOT



vmbra designari: contra verò brumæ longissima, si cū
cæterorum dierum meridie comparetur. atque ut vmb-
ræ certioribus finibus terminatae in terram iaceretur,
regulasq. ipsas ex ære stratis lapidibus inclusas euiden-
tius attingerent, Manlius Mathematicus eius Obelisci
apici inauratam sphæratam addidit: cuius vertice vmbra
in semetipsam colligeretur, & alia atque alia vel incre-
menta vel decrementa suo ipsius apice iacularetur. Sed
hæc alterius operæ, non nostræ, cum sint, ambitiosio-
res omnino, quæm par est, existimari poterimus, nisi
missa faciamus. Ergo ut ad institutum reueremur, duo
tantum Obelisci Augusto regnante Römam deuicti
sunt: cum primum scilicet ipse Aegyptu deuicto An-
tonio atque interempta Cleopatra in Senatus populiq.
Römani ditionem redegisset. Nam quod P. Victor se-
ptem numerat, dubium nō est, quin multis annis post
Augusti obitum in urbem fuerint importati. eorum duo
in Circo Maximo: unus in Campo Martio: duo in
Mausoleo Augusti: unus in Caij & Neronis Circo: in
Insula Tiberis unus, positi spectabatur: octauus in Sal-
lustianis hortis: qui ab æde Sanctæ Susannæ, quæ in
Monte Quirinali est, ad portam Collinā pertinebant,
totamq. interiectam vallem complectebatur. is, vt fe-
runt, Lunæ erat consecratus, Aegyptiisque notis inscri-
ptus. & in iisdem hortis humili prostratus & confactus
etiam num videri potest. Actot quidem Obeliscos ma-
iores Romæ suisse colligimus ex Plinio, Ammiano, ac
P. Victore: nō ignoramus tamen à Bartholomæo Mar-

Gliano

liaho, & à M. Fabio Caluo in descriptione Vrbis tres addi, quorum unus in Circo Floræ, quem eundem eū Sallustiano esse arbitror; alter extra portā Exquelinam sit, tertius in Circo Antonini Caracallæ. Sed nos eos percensere voluimus, quorum mentionem à veteribus Scriptoribus fieri meminimus. Ridicula vero quæstio est ea, quam à nonnullis anxiè tractatam video. Nimirum, cur Plinius ab Ammiano Marcellino dissentiat, quod hic plures, ille pauciores Romæ Obeliscos numeret: quasi verò difficillimum sit scire, à Traiano, quo imperante Plinius vixit, ad Julianum, quem Ammianus regnante vidit, interfuisse annos plus minus ducentos sexaginta quatuor: quo temporis spatio Obeliscorum, & maiorum & minorum numerus augeri facilimè potuerit. nam minores quidē quadraginta duos in Vrbe fuisse idē P. Victor testis est. ad eos igitur duos, quos Augustus statuit, tertius additur à Plinio in Vaticano Caij & Neronis Principū Circo, ex omnibus unus omnino fractus in molitione, quæ fecerat Sesostridis filius Nunconeus. Hæc enim Plinius ipius verba sunt, qui eadē de re lib. xvij. cap. quadragesimo. ita scriptū reliquit: *Abies admirationis precipue in nani; quæ ex Egypto Caij Principis iussu Obeliscum in Vaticano Circo statutum, quatuorq. truncos lapidis eiusdem ad sustinendum eum alduxit. Suetonius etiam in Claudio cap. xx. Portum (inquit) Hostie extruxit circuiclo dextra sinistraq. brachio, & ad introitum profundo iam solo mole obiecta: quam quo stabilius fundaret, Nauem ante demersit, quæ magnus*

magnus Obeliscus ex Aegypta fuerat aduectus. Hæc Suetonius. ex loco Plinij, quem citauimus apertissimè constat, hunc tertium Obeliscum, qui nunc quoque in Vaticano est, alterum ex ijs duobus fuisse, quos à Pherone Sesostridis filio ex oraculo Soli ob restitutum sibi visum fuisse dicatos, memorauimus. Cum ipsem Plinius ad ea, quæ citauimus, verbâ hæc addat: *Eiusdem remanet & alius centum cubitorum, quem post cecitatem ruisu reddito ex oraculo Solis acrauit.* Nihil itaque dubitari oportet, quin hic Vaticanus Obeliscus, Pheronis Obeliscus fuerit. quod si est, quemadmodum certe ex Herodoti, Diodori, & Plinij verbis inter se maximè conscientibus constat, quando, præter eos duos, nullum alium à Pherone statutum fuisse legimus; necesse profectò est, Obeliscum Vaticanum in molitione fractum fuisse; aut cum in Aegypto humi deponeretur, aut cum iam in urbem Romam inuestitus in Circo Caij statueretur. Nam vterque Pheronis Obeliscus centenarum cubitorum erat, hic autem, qui nunc in Vaticano est, quadragenum octonum est. ut maior eius pars fracta, & comminata in molitione fuerit, idest cum vel è sede sua moueretur, vel in Circo Vaticano, ut diximus, statueretur. moliri enim idem est, quod mouere, & substruere. Liuius lib. ix. *Num montes moliri sua sede paramus?* & Virg. *Moliri iam tecta vident, & fidere terræ.* Vel etiam cum à Cambyse ambustus ac deformatus à Caianis operis atque artificibus ad pristinam integritatem ac dignitatem, quantum fieri posset, restitu-

G 2 tueretur



tueretur; quod ut credam, Suetonij verba faciunt, in
 quibus Obeliscum hunc Vaticanum nominari magnum
 video. Neque enim ideo magnum fuisse appellatum
 arbitror eorum comparatione, qui patui sunt, quales
 etiam nunc aliquot Romae conspicuntur. sed ut ma-
 gnitudine iis, qui iussu Augusti vpus in Circo Maxi-
 mo, alter in Campo Martio statuti fuerūt, longè præ-
 stitisse intelligeretur. idq. ex huiusmodi quasi cogno-
 mine non defracto & comminuto, sed de integro &
 adhuc vel Heliopoli stante, vel Romam primū ad-
 uecto accipi oporteret. nam alioqui non ipse magnus
 cognominari debuit, sed is, quem in Circo Maximo
 Augustus statuerat, pedum octogenū octonū, hoc est
 cubitorū quinquagenū octonū & bessis. quod eo ma-
 gis fieri par fuit, quod qui in Campo Martio erat, per-
 inde ac Vaticanus quadragenis octonis cubitis in alti-
 tudinem assurgebat; eratq. omnino ambo inter se in a-
 gnitudine pares. huic accedit quod natūris, qua suum
 Augustus vexerat, quamquam propter magnitudinē
 miraculi gratia Puteolis asservabatur, multo tamen mi-
 nor fuerat, quam ea, quā Caius Cæsar Obeliscum Va-
 ticanum importauerat, omnibus, ut inquit Plinius;
 quæ unquam in Mari visæ essent, mirabiliore. Quan-
 do probabile est eam antequam operæ Obeliscum ē
 sede molirentur, exædificatam fuisse ad eam magnitu-
 dinem, quæ & substituendo centenū cubitorum Obe-
 lisco, & Romam deuehendo par foret. Deinde si le-
 gendum apud Plinium est, Factus imitatione eius quem
 fecerat

fecerat Sesostridis filius Nuntureus, quero, cuius rei imitatione? an figuræ at omnes alij sunt ad eamdem quadratae trabis effigiem conformati. an quod uterque nullas notas inscriptas haberet? at purus etiam, & sine Hieroglyphicis is fuerat, quem à Nectabi rege excisum à Ptolemaeo Philadelpho Alexandriæ fuisse statutum diximus. Nam quod ad materiem pertinet, omnes ex eodem lapide conficiebantur. Supereft ergo, vt imitatio ad magnitudinem referatur, quæ cum centenum cubitorum esset, necessariò concluditur Obeliscum hūc Vaticanum parte maiore diminutum ad nos pervenisse, aut certè tum confactū esse, cum iam in Urbem inuestum operæ Caianæ moliretur. Nihil igitur necesse fuit, locū Plinij mutare, & Hermolaum Barbarum doctissimum hominē negligentē nomine non solum suspectum reddere, sed etiam indicta causa cōdemnare. est enim, nisi planè fallor, locus integer. in quo si quod mendum est, in eo est, quod Sesostridis filium non Pheronem, neque Sesostridem, sed Nuncreum nominavit; quem Diodorus Vchoreum Vchorei filium vocat, & decem nouem ante Sesostridem ætaribus in Aegypto regnuisse testatur. Ergo aut librarij erratum est, aut ipsius auctoris μνημονία απάρτιμο. cuiusmodi nonnulla apud Ciceronem, atque adeò etiam apud Aristotelem legere licet: quæ quoniam ab alijs animaduersa & notata sunt, nihil necesse est, ut hoc in loco à me commemorentur. ille potius scrupulus eximendus est, qui nobis à Plinio ex iis verbis, quibus

bus illic vtitur, iniectus videri possit, ait enim, *Eiusdem remanet & alius centum cubitorum.* Nam cum alius dicatur à Latinis de pluribus, alter de duobus, videtur significare, à Pherone Sesostridis filio nō duos, sed plures Obeliscos Heliopoli statutos fuisse. quod quoniam historiæ refragatur, nos dicimus, alius, pro, alter, à Plinio fuisse usurpatum. idq. non sine veterum exemplo. Sallustius in Catilina, cum de Catone & Cæsare loquitur: *Genus (inquit) etas, eloquentia prope paria fuere, magnitudo quoque animi & gloria: sed alia & alij.* hoc est, sed alia Catoni, alia Cæsari. Et Virg. cum Troiani quarerent, quem cum Darete in pugilatu committerent, aliū non alterum dixit. *Queritur huic alius (inquit) nec quisquam ex agmine tanto, Audet adire virū.* & lib. vi. *Alius Latio iam partus Achilles.* & Cic. lib. vii. epist. *Habes Sardos venales, alium alio nequorem.* Sunt & alia exempla, à quibus supercedendum mihi esse statui, ne in re valde nota diutius quam par est, versari voluisse videar. possem quoque tueri hanc vocem, ea ratione fuisse hic à Plinio relatam non ad duos illos Obeliscos à Pherone Soli cōsecratos, sed ad multos alios, qui tum Heliopoli spectabantur stantes, aut etiam hunc iacentes, quod in superiori Virgilij exemplo fieri etiam potest. si quis autem scire cupiat, quot annis ante Xystum V. Pontificem maximum Phero Sesostridis filium in Aegypto regnauerit, is frustra, nisi planè fallor, in re perantiqua & dubia laborabit. Si enim Eusebium & Diodorum sequemur, Pheronem Sesostridis filium regnauisse cō-

perie-

periemus anno post captā Troiam CCCXXXI. Nam inter Memphim conditam & Pheronem viginti ipsas aetates interfuisse scribit Diodorus, hoc est annos sexcentos, ut singulis aetatibus tricenos anno tribuamus, quod ab Herodoto faciendum esse didicimus. Memphis autem conditam esse constat ex Eusebio anno mundi IIMICCVIII. vel ut alij volunt IIMCCXXXVIII. Troiam vero captam IIIIMXX. quartaione annorū summa post captam Troiam LVIII. vel CCCXXXI. vti diximus, conficitur. Ut inter Xysti V. Pontificatum & Pheronem anni ipsi interfuerint vel IIMCCCCLXXII. vel IIMICXCIX. Quod si Aristotelī potius credendum esse statuerimus, & Valerio Flacco, Sesostridem & Pheronem multo ante Trojanum bellum fuisse fateamur necesse est. Nam Aristoteles Politi. vij. Sesostridem longo temporum intervallo Minoe Cretensium rege priorem fuisse testatum reliquit. Minos autem, vt Herodotus Polymnia scribit, tribus aetatibus, hoc est annis fermè centum Trojanum bellum antecessit. Ex quo sequitur aut Eusebij & recentiorum calculum fallum esse, aut Aristotelem deceptum id pro certo pronuntiasse, quod minus exactè ad calculum reuocauerat. Cum præsertim ab eodem Aristotele codē in loco tribui Sesostridi videamus, quæ neque Herodotus, neque Diodorus usquam tribuerunt. quamquam illius res gestas diligentissimè persecuti sunt. Ego in lite tam perplexa, Amplius pronuntiadum esse céso. Nam quod ad Valerium Flaccū perti-

pertinet, qui templum apud Colchos, ad quos Argonautæ peruererant, fuisse scribit, in quo res gestæ à Se-
sostride piætæ spectabantur, nullius momenti argumé-
tum esse arbitror. Et si enim ex eodem Eusebio didici-
mus annis centum ante bellum Troianum Argonau-
tas fuisse, quia ratione necesse sit Selostridem & Phero-
nem multis annis Troianum bellum antecessisse, nos
tamen veritatem ex historia & Faſtis, non ex poetis pe-
tendam censemus; qui, prout illis com modum est, re-
rum & temporum ſeriem perturbant, ut cauſam inue-
niant, qua granditatem fabulae & actioni à ſe institu-
pariant. Vt cumque tandem ſit, iuuat me vel auctori-
tatis pondere, vel inclinatione voluntatis in eam partē
propendere, quam video Aristoteli placuisse. proba-
bilius enim eft in tanto decurſu temporum, quæ ne-
mo ex veteribus diſtinctè adnotauit, calculos falli quā
virum illum diligētiſſimum ac doctiſſimum à vero ab-
errare. Sed nos hac in re diligētores fuimus, vt vnicui-
que iudicium ſuum liberum relinqueremus. Superest
nunc, vt de illo loquamur, quem multis post Augu-
ſtum annis in Circum Maximum importatum legi-
misi. Cum ille vel religione motus, quod Soli præcipue
ſacratus eſſet, vel ponderis grauitate, & tātæ molis ma-
gitudine territus, intactum Heliopolitanis relique-
fat. At Conſtatīnus, qui cum Conſtantio & Conſante
fratribus Romæ imperabat, ē Solis ter plo auellendū
curauit. mox Conſtantino mortuo nauī, que trecenti-
ſis remigibus agebatur, ad eum uſum comparata Ho-
ſtiam,

stiam, indeq. aduerso Tiberi ad Alexandri vicum de-
nectus constituit, tribus scilicet millibus passuum ab Ur-
be distante. Ex quo loco per portam trigeminam in Cir-
cum Maximum ergatis ac trochleis actus est, ibi q. non
sine incredibili multorum artificum atque operarum
labore erectus, illiq. inaurata sphæra imposita: quæ
solaribus radiis percussa fulgorem longè lateque iace-
ret. Hic inter se videntur dissentire. P. Victor & Am-
mianus Marcellinus, nam ille in describeta Circi Ma-
ximi regione xi. *Obelisci* (inquit) duo: iacet alter, alter
erectus. contrà Ammianus utrumque erectum esse te-
statur. quod sanè mirum videri possit, cum in eorum
dem Imperatorum tempora incidisse ambos certum sit.
quæ tamen controversia penitus tolletur, si Obeliscum
illum diu in Circu Maximo, ut verisimile est, iacuisse
existimemus, antequam statueretur. quo iacente scili-
cket, P. Victor regionem illam descripsiterit: Ammianus
autem iam erecto & constituto historiam suam exara-
uerit. id quod si verum est, quemadmodum certè exi-
stimari oportet, haud omnino sine argumento cogi-
tare poterimus, eos Obeliscos, qui in Circu Maximo
fuerant, confractos & comminutos esse, cum eos seu
Barbaræ nationes, quæ in Urbem irruperant, seu etiam
ipsimet Romani humi deiecerunt. neque enim credé-
dum est quemquam tum fuisse, qui sibi tantos sum-
ptus in moliendis de sede sua, humiliq. sensim deponé-
dis huiusmodi tam vastis molibus faciendo esse sta-
tueret, quantos fieri oportuisse non ignoramus in de-

1501

H

molien-

moliendo ac deponēdo Obelisco, quem in aream Vaticani transferri vidimus. Quod etiam cæteris omnibus Obeliscis accidisse quis dubitat? præsertim cum videat eos, qui ad Augusti Mausoleum antea cum starēt, nunc ita prostratos & comminutos, ut fragmenta tantum supersint. Quorum, quoniam in mentionem incidimus, non erit à re proposita planè alienum, si quæ de iis legendō obseruauimus, vel conjectura consequi potuimus, cum studiosis rerum priscarum hominibus communicauerimus. Primum igitur nihil est, cur opinemur ab Augusto fuisse vel in Vrbem inuectos, vel eo in loco statutos, quando neque Plin. neque Suet. eorum mentionem facit vllam, qui annis post Augustū plus minus X C I I I I. Traiano scilicet & Adriano imperantibus historias scripsérunt suas: sed ne Strabo quidem, qui ipsius Augusti temporibus floruit, eorū Obeliscorum meminit, cum tamen Mausoleum ita describat, ut ambitiose propermodum omnia persequatur, quæ locum illum ornare atque illustrare videbantur. Neque, quod sciam, quisquam alias è veteribus meminit præter P. Victorem: qui duos Obeliscos in Mausoleo Augusti fuisse memorat, magnitudine pares, sed cæteris omnibus, qui Romam inuecti fuerant, longè minores. quippe qui quadraginta duorū pedum & semis, hoc est cubitorū viginti octo tantū essent. Quorū unus, cuius fragmenta humi atque adeo in media ipsa via iacebant Xysti V. Pont. Max. iussu aucta sunt, atque ante hortos suos, quos in Exquiliis habet ante ædē

sanctæ

sanc*tæ* Mariæ cognomēto Maioris in pristinam Ober-
lisci formam concinnata. Alter adhuc eodem in loco
post ædem beati Rocchi prostratus & comminutus vi-
situr. Quod autem ad naues pertinet, quibus ex Aegy-
pto in Vrbem importati sunt, trium omnino auctores
meminerunt: duarum videlicet Plinius: Ammianus
vnius: & eas omnes maximæ cuiusdam, ac portentosæ
magnitudinis fuisse testantur. Nam eam, qua D. Au-
gustus in priore Obelisco ex Aegypto ad Vrbem ve-
nido usus fuerat, miraculi gratia Puteolis naualibus per-
petuis dicauit, ac mox incendium assumpsit. Multo
tamen maiorem illam fuisse credimus, quæ Vaticanū
Obeliscum Hostiam importauit; de qua sic Plin. *Abies*
admirationis præcipue in navi, quæ ex Aegypto Caij Prin-
cipis iussu Obeliscum in Vaticanano Circo statutum, quatuorq.
truncos lapidis eiusdem ad substinendum eum adduxit.
Qua naue nihil admirabilius visum in mari certum est. Cœ-
tum viginti millia modium lentis pro faburra ei fuere, lōgi-
tudo spatiū obtinuit magna ex parte Hostiensis portus la-
tere laeo. ibi namque demersa est à Claudio Principe, cum
tribus molibus turrium altitudine in ea exædificatis, obiter
Puteolano puluere, adiectisq. deq. eadē idem Plin. cap.
ix. lib. xxxvi. Diuus Claudiu*s* (inquit) aliquor per annos
afferuatam, qua Caius Cæsar importauerat, omnibus, que
enquam in mari vise sunt mirabiliorē, turribus Puteo-
lano ex puluere edificatis perductam Hostiam portus gratia
merfit. hæc Plin. quibus Sueton. his verbis assentitur.
Portum (inquit) Hostie extruxit circumducto dextra fini-

H 2

straq.

straq. brachio, & ad introitum profundo iam solo mole obiecta, quam quod stabilius fundaret, nauem ante demersit, qua magnus Obeliscus ex Aegypto fuerat aduectus: congestisq. pilis superposuit altissimam Turrim in exemplum Alexandrini Phari, ut ad nocturnos ignes cursu in nauigia dirigerent. Atque hanc quidem nauem ex earum genere fuisse verisimile est, quae in longitudinem instar triremiū porriguntur. Si enim magnam oris Hostiensis portus partem demersa occupauit, profecto necesse est longissimam fuisse, ut Ammianus magnificè potius & oratione dixerit, nauem illam suam, quae ad Constantiūnum Obeliscum ex Aegypto deferendum ædificata est, inusitatè magnitudinis fuisse: idq. ex eo intelligi vult, quod trecentis remigibus ageretur. Sed breuius omnino ille quidem, vel obscurius potius locutus est, quam res ipsa, de qua agebatur, postulabat. nos, quia nauem à Caio exædificatam ad Obeliscum centenum cubitorum, omnium scilicet maximum, excipiendum demonstrauimus, in ea sententia persistimus, ut nullam aliam nauem cum Caiana naue comparari potuisse censemus. cuius magnitudinem, si quis exactius scire desideret, is ex obiectæ portui molis longitudinis dimensione, quod haud difficillime fieri potest, si non omnino quanta fuerit pro certo statuere poterit, non longissimè tamen ab eo, quod queret, aberrabit. Et quoniam Plinius cum de Caianæ nauis magnitudine locutus esset, subiicit hæc verba: *Alia ex hoc cura nauium, que Tiberi subuehant: quo experimento palam fuit, non minus*

nus aquarum huic anni esse, quam Nilo. Videndum est, quare ratione concludat Tiberim esse aequalem Nilo. Nam quod quidam existimat Obeliscum illum fuisse ab Heliopoli ad mare deuectum, cum Nilus excreuisset, & item Romanum inuectum, cum Tiberis aquis auctus fluueret, commentitium est, & nullius momenti coniectura. Neque enim fluminum altitudines inter se comparantur, cum imbribus, aut liquatis niuibus auentur: sed cum surapte natura fluunt. Existimare igitur oportet, eam nauem, seu ratem appellare malueris, qua Nilo ad mare deuectus, quaq. Tiberi in Urbē inuectus Obeliscus fuit, eiusdem fuisse magnitudinis. aliter enim dignosci non potuit Nilus ne an Tiberis ex sua natura plenior fluueret. Quare nō temere sensisse videri potero, si locum Plinij mendosum esse, & in eo aliquid desiderari dixero, ex quo nauem, qua Tiberi subiectus Obeliscus est, parem illi fuisse intelligamus, qua Nilo antea ad mare deuectus fuit. Huiusmodi autem nauem multo maiorem fuisse Obelisco, quē vchebat, necesse est. neque enim aliter tanta moles à flumine sustineri potuisset. Sed hanc omnem curam & cogitationem ijs relinquamus, quorum ad facultatem pertinet ratiocinari, quibus artificiis, quibusq. machinis quæq. moles ac pondera sustineri & perferri sine offensione possint. Atque his ita se habentibus illud mirari libet, quod Theophrastus Aristotelis auditor, & vir in primis doctus & grauis in eo libello quem πεπιλθω, scriptum reliquit: in Aegyptiorum Sacerdotum

tum commentarijs memoriae mandatum testatur , co-
rum regi à Rege Babylonio muneris loco missum Obe-
liscum ex Smaragdo quatuor cubitorum longitudine ,
latitudine trium . præterea fuisse apud eos in Iouis de-
lubro alterum Obeliscum è quatuor Smaragdis com-
positum & concinnatum , quadraginta cubitorum lon-
gitudine , latitudine verò in parte quatuor , in parte
duorum . Quod si verè à Theophrasto atque ex histo-
riæ fide traditum est ; cur non etiam credamus , quod
Apion cognomento Plistonices scriptū reliquit ? Fuis-
se scilicet in labyrintho Aegypti Colosseum Serapim è
Smaragdo nouem cubitorum . Ut si Smaragdi magni-
tudinem spectemus , mirari minime libeat Genuensiū
patinam , quam illi hodie ex Smaragdo confectam , &
in sacrario asseruatam hospitibus venerabundi ostendunt . Sed hæc πάρηγα . Ergo ijs omissis ad Obeliscum
redeamus , & hanc scriptionem nostram aliquando tan-
dem suis finibus terminemus . Dictum à nobis supe-
rius est , Obeliscum , quamquam eum Mitres primus
instituit , ut somnio satisfaceret , posse tamen ex figura
qua constat piè sancte q. ad hominum mētem in Deū
se se erigentem αλληγοριῶς referri . quemadmodum
enim radij solares eo latius diffunduntur , & patescūt ,
quo longius à sole absunt : coeunt autem in vnu quasi
punctum cum in auctorem & parentem suum Solem
desinunt ; ita Obeliscus cuius quatuor latera quatuor
totius orbis terrarum partes significant , cum ab infi-
ma sui parte latè pateat , paulatim gracilescit , donec

acu-

acutissimo apice terminetur. Ad cuius imaginē mens nostra, si se in varias curas distrahi sinat, & humanis affectibus affixa hæreat, numquam se colligit, sed si visu veniat, ut ab huiusmodi cogitationibus, atque ab honorum ac divitiarum, aliarumq. terrestrium rerum cupiditatibus separare ac disiungere se incipiat, non constit illa quidem donec in altum paulatim erecta & acutior facta, Deum inuenit, in eoq. tota immersitur & conquiescit. Sed hanc partem quæ ad *αλληλοπίαν* pertinet, quoniam ab aliis & acutè & copiosè tractatam video, consultò prætermittam. Illud tamen quod huius scriptionis nostræ proprium est, si tacuero; fortasse id fecisse videri potero, quod iure optimo in multorum reprehensionem incidere debeat. Dicimus igitur Xystum V. Pont. Max. incredibili sapientia duas res potissimum videri secutum esse, cum in eam mentem venit, vt tam insignem Obeliscum in patentem locum importaret, eiusque apici crucem imponeret: quarum altera est, vt uno eodemq. tempore eum se esse ostenderet, qui & beneficentissimi patris, & summi Principis; altera, qui religiosissimi Sacerdotis & Pontificis Maximi personam gerere se non ignoraret. itaque animum ad exornandam Urbem & ad pietatem in hominum mentibus imprimentā conferre oportuit: si tantorum nominum pondus & maiestatem laudabiliter ferre & tueri voluisse. Neque enim quidquam expectari tum à Patre & Principe, tum à Sacerdote & Pontifice maius potest, quam & in populū gratuita caritas;

& pu-



& publicorum operum insignis magnificentia & vita
innocentia singularis, & Christianæ pietatis in quaque
re studium incredibile. In quibus quidem omnibus
omnium bonorum opinione & consensu tantus exti-
tit, quantus ne desiderari quidem à quoquam vel po-
tuit vel debuit. Quippe qui cum primū est à Patri-
bus Pontifex nominatus & sacerdos, qui tū in ipsa Ur-
be, tum in cæteris Italiæ partibus impunè grassabatur,
substulit funditus; & ingrauescentem in dies annona-
sua pecunia, & ea quidem ingenti subleuauit: & mor-
res re ipsa sic correxit, ut piè sancteque omnes sibi esse vi-
uendum duxerint: Urbem verò patefactis ac directis
vijs commodiorem & pulchriorem reddiderit: quibus
ad religiosissima quæque Sanctorum templa sine vlla
molestia, immo etiam cum incredibili animi volupta-
teiri à ciuibus & peregrinis possit. Quirinalem Mon-
tem repurgatis fontium riuis, & itineribus eorum, ad
perennem usum ingenti sumptu apertis, & confectis,
perque ea saluberrimis aquis, & copiosissimis in Urbe
introductis, mirabiliter excoluerit. usque adeo scilicet,
ut qui illic hortos habent, nō iam de hortis ad volupta-
tem instruendis, sed de ædibus ad familiarem & quoti-
dianum usum ædificandis cogitent. Tempa verò &
facella, quæ vel temporum iniuria, vel hominum ne-
gligentia aut labebantur, aut minus certè iam frequen-
tari coeptra erant, magnificentissimè instaurauit. Aedes
Lateranenses in monte Cælio, quas Silvester, aliquæ
sanctissimi Pontifices habitarunt, cù situ & squalore
obdu-

obductæ viserentur, partim parietibus & porticibus à fundamentis excitatis, partim ambulacris & concluibus in pristinam dignitatem & usum restitutis; efficit, ut & corum locorum quasi quadam admonitione incolmis seruaretur memoria, eorumque propemodum aspectum oculis illi usurparent suis, qui templum illud augustissimum religionis caussa, aut statis anni diebus, aut alio quoquis tempore plurimi ex omnibus adeunt nationibus. Nam cum illic illi ipsi scalarū gradus sint ex Hierosolymis in Vrbem à Pījs Pontificibus atque Imperatoribus perlati, qui Christum salutis nostræ authorē in prætorium ad Pontium Pilatum ascendentem, ut cruciaretur, sustinuerunt; quique eius vestigia, penè dixerim, impressa etiamnum referuant, & præterea cùm permulta alia, tum columnæ visantur, quæ, cum idem Deus & homo moreretur, mirabiliter vñà cum templo à summo vertice ad imam partē scissæ sunt, turpe omnino videri poterat, quòd loco tam ab omni cultu derelicto haberentur. Et verò res ipsa non minus à bonis omnibus tacitè reprehēdebatur, quām esset apud exterias nationes in insigni infamia; Romæ, in qua vrbe Christiana pietas sedem fixerit, tot hominum millia eiusdem pietatis colendæ caussa morti se deuouerint, sanctissimi Pótifices inhabitarint, ea propemodum contemni monumenta, quæ castissimè colere, & religiosissimè venerari oporteat. Id autem etsi in primis animo, & cogitatione fieri necesse est, tamen nisi externi etiam templorum, & piorum locorū

I

cultus,

cultus, atque ornamenta adhibeantur, ex quibus verā erga Deum pietatem mentibus infixam esse constet, paulatim eò res recidit, ut vñà cum locis ipsis pietas etiam ipsa, si non omnino contemnatur, in ea certè estimatione non sit, in qua diuina atque humana omnia præcepta & instituta semper haberi, & verò etiam esse voluerunt. Quemadmodum enim hominum intemperantiam non modo alunt, sed etiam augent, atque identidem excitant signa, ac tabulæ, quæ ad venustatem & lasciuiam ab excellentibus artificibus & finguntur & pinguntur; ita eorumdem animos ad Dei Optimi Max. cultum atque ad piè sancte q̄. viuendum reuocant magnificæ templorum ac facellorum substructiones, religiosorum locorum ornatus non vulgares, qui quantumuis ingentes sumptus faciēdos esse indicent, quorum ope ad pietatem è media rerum humanaarum cogitatione & voluptatum illecebris interdū sic reuocemur, nihil ut tam pretiosum esse apud nos censeamus, quod in primis vni ipsi Deo nō debeatur. Optimè itaque factum quod vetustissimum illud sanctissimorum Pontificum domicilium restituerit: quod eodem in loco veteres Ecclesiæ ritus ac cæremonias renouauerit: neque tantarum rerum memoriam paulatim intermori passus sit, quæ propemodum oblitteratae ex hominum animis magno cum Christianæ pietatis detimento parum aberat, quin penitus interirent. Eò etiam pertinent Apostolorum duorum signa, Petri scilicet & Pauli ex ære mirabili artificio facta, & Cochlidi-

chlidibus columnis imposita, quorum altera Traiani, altera Antonini Pij res gestas lapideis imagunculis ad eas quasi in Theatro quodam repræsentandas fictis, & conformatis complectitur. Quæ nos parari cum vidissemus, continere ἐνδοστασιὸν non potuimus, quin his carminibus factum sanctissimi Pontificis, ut mihi quidem videtur, pulcherimum prosequeremur.

Quam quondam posuere Patres Populusq. columnam

Traiano ob viētos peitora seu Getas,

Hanc Xysti pietas Quinti ter maxima sanctis

Subiecit pedibus Petre beate tuis:

Ut, quæ Barbaricis Urbem testata potentem est

Gentibus imposito colla grauasse iugo,

Hæc eadem parere tibi testetur & Vrbem,

Terrarum & quidquid maximus orbis habet.

Hæc in Traiani, quæ sequuntur in Antonini Cochlidem scripta sunt.

Quæ Cochlidis moles nobis operosa columnæ

Ostentat valida bella peracta manu,

Atque Antonini, post regna euersa Quiritum,

Seruat in inciso marmore facta Pij:

Maximus hæc subter pedibus premit omnia Paulus,

Armatus libro Paulus & ense manum.

Xystus enim Quintus, statui sic iussit, ad omnes

Clamet ut ex alto conspicuoq. loco,

Et vita insonti, & doctrina, & fortibus ausis

Barbara sunt Latio colla premenda iugo.

Et verò si Aristogitonis & Harmodij statuę ab Atheniensi-

niensibus in foro positæ, quòd Hipparco Pisistrati ty-
rani filio, eodemq. Hippie tyranni fratre interempto li-
bertatem patriæ restituissent suæ, præclarissimū factum
ciuibus in memoriam, quoties conspicerentur, reuo-
cabant, si idem apud Romanos Brutus illius, qui Tar-
quinios eiecit, signum in celeberrima Vrbis parte po-
situm faciebat, si nobilissimæ quæq. familiæ maiorum
suorum, qui Remp. præclarè gessissent, imagines do-
mi habebant propositas, quas eorum liberi ac nepotes
intuentes eos imitarentur, quos illæ repræsentabant;
si in nobilissimis quibusque vrbium locis huiusmodi
sexcenta alia proponebantur, piætûræ, arcus, natum
rostra, trophæa, columnæ, quæ posteros illustrium fa-
cinorum identidem admonerent, neque è memoria
cuiquam elabi paterentur, sed accenderent potius, at-
que adeò inflammarent animos ad præclarè agendum;
cur hoc quoque prudentissimè cogitatum non iudica-
bitur, his præsertim tēporibus, quibus maximè opus
est, vt, quacunque re fieri potest, in Christianis homi-
nibus diuini cultus memoria renouetur, & ad irâ Dei
placandam assiduis precibus excitetur. Utinam curam
hanc vnam maiores nostri, atque adeo Pontifices om-
nes suscepissent, vt Deorum omnium imagines ac si-
gna ex hominum oculis & memoriæ penitus tolleren-
tur, ac pro iis eorum statuæ, qui Christianè, hoc est piè
sancteq. viuendo in cœlum euocati sunt, reponeren-
tur. id enim si factum esset, longè melius Christianæ
pietati consultum fuisset. Nunc autem eò ventum est,

vt

vt cū summi alicuius Principis , aut viri alioquin opulentis ædes ingredimur , aut hortos ac villas adimur , ea signa & picturas passim conspiciamus , quæ nos dubitare planè cogant , pietas ne illic Christiana , an gentium , quas appellant , superstitione colatur . Quòd si hęc in priuatorum ædibus ferenda non sunt , quanto minus in publicis arcis , ac viis , atque adeò in ipsa Vrbe Roma , in quam omnes omnium exterarum nationū oculi coniecti sunt ? quòd quæcumque hic fieri vel vident vel audiunt , eadem sibi licere arbitrentur . Ut nō immerito existimemus eadem peccata grauiora esse , si à Principibus , quām si à priuatis hominibus committantur . illi enim tanquam in Sole versantur , & facile reperiunt , immo etiam paratos semper habent quā plurimos , quos exemplo suo corrumpant . Id quod nobis , qui in umbra propemodum delitescimus , minus vñ euenire consuevit . Prudenter itaque & hęc sanctissimorum Apostolorum signa columnis Cochlidibus imposita sunt à prudentissimo Pontifice , & ea è Capitolijs turre deiecta , quæ quasi ex edito loco clamare videbantur , nondum impuros illos gentium Deos viatos è Capitolio discedere voluisse . discesserunt illi aliquando tandem , & locum , ita iubente Xysto V. Pont. Max. & acerrimo Christianæ pietatis assertore , melioribus dederunt . quod factum cum esset , & pię sancte factum , nemo bonus negaret ; remanebat in Vrbe Obeliscus , de quo supra copiosè locuti sumus , ruderibus ille quidem , & ædium , quæ corruerant , parietinis

nis & cæmentis penè obrutus: sed, quod miraculi loco haberi debeat, nullam omnino vel barbararum nationum, quæ captam Vrbem & euersam solo æquaerunt, & cæteros Obeliscos humi deiectos confregerūt, vel Romanorum etiam ipsorum in iuriam passus, aut aeris & ingruentium ventorum vi atque intemperie villa ex parte vel ex eis vel comminutus: ut ad aliquem alicuius ætatis usum & felicitatem conseruari videatur. at in qua Vrbis parte remanebat? nempe in Vaticano, atque in ipso Caij & Neronis Circo, quem eorum hominum, qui iam inde à Christianæ pietatis initio Christo humanæ salutis auctori nomen dederant, ac datū constantissimè tuebantur, sæpe sanguine redundantem viderat: in quo duo Imperatores, geminæ humani generis faces, in Christianum nomen sœuentes currum flagitosissimè agitarunt: in quo denique & tēplum Petro Apostolorum principi magnificentissimū sit ædificatum, & sedes ad inhabitandum summis Pontificibus attributa. Itaque ille quidem sic delitescebat, ut & scelerum, quæ illic commissa fuerant cum plurima tum immania, recordatione & memoria quasi lugere, & loci religionem & frequentiā perhorrere ac reformidare quodammodo videretur: mirareturq. iden tidem secum, quod le illictam diu esse cum ciuitas ipsa, in qua Christiana pietas tanto ante tempore sedem fixisset, tum Pontifices Maximi, qui relicto Cælio Vaticanum incolebant, patienter ferrent. ac profectò nō defuerunt, qui Patrum memoria sæpe animo agitauerint,

rint, qua ratione, quo sumptu, quibusq. machinistā
immanis moles ē sede, in qua fuerat posita, integra
auelleretur, & in area Vaticani sic statueretur, vt augu-
stissimi templi vestibulum non modo ornare, sed etiā
venerari videretur. idq. quo minus fecerint, caussam
omnino fuisse existimare possumus, quod partim sū-
ptu deterriti, partim artificum inscitiae diffisi, partim
temporum iniuitate impediti, atque immatura mor-
te sublati, vel aliò animum traduxerint, & à pulcherri-
m ifacti gloria reuocauerint, vel rem penè inchoatam
perficere non potuerint. Stabat itaque trabs illa saxe,
quamquā obscuro in loco, in Vaticano tamen: viseba-
turq. quotidie ab externis nationibus nō omnino sine
Christianæ pietatis detimento: A sacrosanctis enim
altaribus ac locis piis in sui admirationē omnium oculos
conuertebat, quorum etiam plerique Cæsaris cine-
res venerabantur: quos in sphæra illa inaurata, quam
Obelisco impositā videbant, inclusos esse falsò ex vul-
gi opinione sibi persuaferant. quamobrem ne diutius
cum tanto nominis Christiani dedecore atque iniuria
tam antiquum antiquæ impietatis & flagitiorum mo-
numentum superesset, atque ut animos hominum po-
tius à superstitione ad verum Dei cultum referri opor-
tere admoneret, post quam sartum tectum, vt ita lo-
quar, ad Pontificatum suum peruenisse Xystus V. Pōt.
Max. animaduertit, non ille quidem euertendum, &
infringendum sibi esse existimauit, sed ē sede auellen-
dum sua, & imposta illi Cruce in celeberrimo loco

statuen-

flatuendum. Atque ab hac tam laudabili cogitatione, nullæ, neque rei nummariæ difficultates, quæ exhauit penitus ærario summæ erant, neque incredibilis annonæ caritas, qua vehementer laborabatur, deterre potuerunt, quominus opus tam laboriosum, & à nullis antea tentatum aggredieretur. Quamquam vulgo non deerant, qui tam grande incœptum reprehenderent, idq. Vespasiani auctoritate tuerentur, qui artifici cūdam pollicenti se in Capitolium magnas quasdam columnas exigua impensa perducturum, respondit, velle se plebeculam pascere. Optimè illi quidem, si, vt Obeliscum moliretur, in pascenda plebe eum se, quem oportebat, non præstisset. Cui enim dubiū est fuisse nos magnū famis periculum subituros, nisi Deus Opt. Max. Pontificatum huic vni detulisset? qua de re plura non dicā. illud dicam, quod nemo est qui neget: nec ulli scilicet defuisse unquam unde se copiosè aleret, nec à cæteris operibus cessatum: in quibus præterquā quod plurimorum inopia cotidiano vietu sustentabatur, ingens etiam erogabatur in plebem pecuniarum vis; quod qui beneficissimi patris & liberalissimi Principis munus esse in primis necessarium non intellegit, is se aut plane maleuolum, aut Reip. gubernandæ penitus imperitum fateatur necesse est. Sed quid agas? numquam incœptis quantumuis egregiis & laudabilibus obscuri & latētis animi obrectatores defuerunt. ostendit hoc Homerus, qui Thersitē abiectissime fortis hominē Agamemnoni, Nestori, Vlyssi, Achilli, & cæ-

& cæteris illis Græcorum principibus obloquentem facit, omnibusq. contumeliosissimè maledicentem : cū tamen illi & rerum gestarum gloria illustres essent, & prudentia, quæ in administranda regendaque Rep. & virtute, quæ in bello faciendo, profligandisq. hostibus principem locum obtinet, mirabiliter excellerent. sed, ut Vlysses Thersitem, vir scilicet sapientissimus hominem nequam & perditum ; ita Xystus V. Pont. Max. non quidem impacto ad illius exemplum in frontem sceptro, sed planè leuato in Annonæ caritate populo, & fide, quæ passim in tanta grassatorum & latrociniorum frequentia conciderat, restituta : maleuolorum sermones compescuit ; &, quod semel animo conceperat, effecit. effecit autē non quidē cum voluit, nam ad id diem ante Kal. xvij. Octobris constituerat, quo die Christiani homines Exaltationem Crucis celebrant, sed ante diem sextum Kal. eiusdem mensis, quod alij artificum negligentiae, ego diuinæ voluntati tribendum censeo. Nam cum eo die Sol tertiam Libræ partē peragret, è signo, quod ad nos pertinet, abiectissimo, ipse omni dignitate spoliatus Crucem adorare supplex & potuit & debuit in summo illo Obelisco positam, quem sibi à Pherone Sesostridis F. Heliopoli, recepto visu dicatum, deinde Augusto & Tiberio Cæsaribus Romæ à Caligula consecratum meminisset : mirandę scilicet antiquitatis molem, quam tum in media Vaticanī area atque ante eius templi vestibulum, quo nullum est in toto terrarum orbe magnificentius statui,

K

ciusq.

eiusq; vertici Crucem imponi iussit Xystus V. Pont. Max. ut quæ ad modum depulsæ cœcitatibus causa ab Aegyptio Rege olim statuta fuerat, ita in futurum diffusæ à Christo crucifixo euagelicæ lucis testis esset, & à superstitione hominū animos ad Christianæ pietatis cultum abocaret; quod quidem sapientissimi ac sanctissimi Pontificis, & liberalissimi Principis factum, Thuiusmodi esse homines cum fateantur, ut pro tantæ substrictionis magnificencia, & in credibili reverentia, quam adhibere par est aduersus Deum, quamque omnibus ex aspectu ipso in cuti sibi sentiunt, nemo quantum visueloquens laudare satis possit, nos protinusq; iustitia tenuitate his trimetris sumus capidebat, quam oratione prosecuti.

Efficit autem non diuine curia, duo dic
id dicitur inde K. 27. etiam K. 28. Ogopte constituerat
Obeliscus Antipheronis, dicitur
Iehu deinde dicitur eodem locum K. 29. etiam locum
Olim Syenes arduis è montibus
aristilicium neglegente
immensis, asper, & per horridas lapis
quæ cœruleæ, siam amiserat,
Vrbem vetustam vestus Heliopolim,
peras gressu, q. ubi
Sublime Cœli sustuli ad limen caput.

Sic namque iussit clara regis inclytri
Virtus Pheronis, utriusque luminis
Visu recepto, cuius usum amiserat,
Ob namen à se fluminis lesam: illius nile
Ut asserebat cœca secli vanitas,
Secli vetusti vanitas, perennibus
Inesse numen arbitrantis fontibus,

.parte

K

Auctis-



Audisque Nili fluxibus : sed ut tamen
Phero superbi filius Sesostridis ,
Qui solus imperarat orbi maximo ,
Joue annuente cætitatem depulit ,
Soli sacrauit lucis ipse me patri .
At plurimarum plurimis etatibus
Deinceps per actis gentium , per equora
Longinquanae prouidus vastissima
In Romuli altam vexit urbem Caius
Circoq. in ipso , quem sibi substruxerat ,
Longe imminentem ludicris curulibus
Famæ dicavit Casarum , sat inscius ,
Ætas futura quo vicissitudines
Rerum pararet omnium Quiritibus .
Quas ipse solus , ipse solus vndique
Fugi ruinis obrutus , quod scilicet
Non comminutus parte ab ulla , at integer
Seruarer hoc ad tempus : in quo Pontifex ,
Quot quot fuerunt omnium vel maximus ,
Centura necnon quo videbunt secula ,
Xystus reuulsum pertulit in aream
Late patentem . tum ferendam vertici
Crucem supremo fixit , ut palam foret ,
Hanc esse solam , que Pheroni , & omnibus
Perenne lumen preferat mortalibus .

2 1 1 2

K 2 Conque-

